

مشروع الحكواتيات

ورشة المعارف

الحكواتية: دلال عباس
التاريخ: ٢٣ أيار ٢٠١٩
رقم الأرشيف: 19-PS/ SS-005
نوع الأرشيف: للاستخدام المحدود

السلسلة/الموضوع الرئيسي	قصص من الجنوب
رقم الأرشيف	19 PS/SS -005
نوع الأرشيف	استخدام محدود—يجب استشارة الحكواتية قبل استخدام هذه المقابلة لأي غرض ثقافي أو بحثي
الحكواتية	دلال عباس
تاريخ ميلاد الحكواتية	1947
تاريخ ومكان المقابلة	٢٣ أيار ٢٠١٩
ملخص التاريخ الشفوي	تحكي دلال عباس قصة حياتها، التي شكلتها أمها من خلال إصرارها على تعليم أولادها وابنتها فانتقلت بهم الى النبطية ليكون لهم مستقبل وان يكون لابنتها إنجازات في المستقبل. تتحدّث عن مسارها كطالبة وبداية انفتاحها السياسي في دار المعلمين في صيدا. تتذكّر اول مظاهرة خرجت فيها سنة ١٩٦٨ وعلاقتها بال "حجاب"، وتجربتها في العيش في إيران التي تركتها بعد ان قامت الثورة الايرانية. تتذكّر الاجتياح الإسرائيلي. تخبر عن مسيرتها كمعلمة من المدرسة النموذجية الى تسلمها إدارة ثانوية النبطية للبنات بعد ان فتحت سنة ١٩٨٤. تتكلم عن استعانتها في الثانوية بسلمى علي أحمد، رئيسة جمعية تقدّم المرأة التي كانت دلال عضوة فيها. تحكي عن صعوبة فقدان ابنها عام ٢٠١١. تشرح عن سوء تفسير الدين الإسلامي فيما يخص بحقوق النساء. نسرين رجب هي كاتبة حاصلة على شهادة الدراسات العليا في اللغة العربية وآدابها.
معلومات عن الباحثة	
التفريغ	هند يونس
الترجمة والتدقيق	ديانا خنافر
الكلمات الدلالية	كوثرية السيد- النبطية- ثانوية النبطية الرسمية للبنات- مدارس الكتاب- كفرمان- النميرية-مخطوطات-الفرنسيين-جبل عامل- لفاية- علماء الدين- مطالعة- مدرسة المقاصد-عاشوراء-العوام-ممارسات التطبير- دار المعلمين الابتدائية في صيدا- مظاهرة- أحزاب- اليسار- الحجاب- إيران- ادب فارسي- القصف الإسرائيلي- الاجتياح- مقاومة- ثانوية الصبّاح- سلمى علي أحمد- جمعية تقدّم المرأة- لجنة حقوق المرأة- بهاء الدين العاملي- الجامعة اللبنانية- أولاد- موت الابن-

Rights of Ownership for the Storytellers Project

The Knowledge Workshop holds full or co-ownership of all items that it archives and publishes. Recordings published on the Knowledge Workshop website can be used only for cultural, educational and non-profit purposes, and never for commercial purposes.

To use the material on our website, including the oral histories and their related images, we ask that you always reference the Knowledge Workshop with: Storytellers's name, interviewed by Researcher, Date, The Storytellers Project, the Knowledge Workshop, Beirut, Lebanon, page number. [Ex. Nazik Saba Yared, interviewed by Deema Kaedbey, 2017, The Storytellers Project, the Knowledge Workshop, Beirut, Lebanon, pp 12.]

To use the limited-use items held within the Knowledge Workshop, you can visit our office in Furn El Chebbak and fill out a permission form. You can use these items inside the Knowledge Workshop space, but we request that you consult with us on which items you can use. Some of these items require permission from the storytellers before being used.

حقوق ملكية لمشروع الحكواتيات

لورشة المعارف ملكية تامة أو مشتركة للمواد التي تورشفها وتنشرها. التاريخ الشفوي المنشور على الصفحة الالكترونية لورشة المعارف يمكن استعمالها فقط لأهداف ثقافية وتثقيفية لا تبغى الربح، ولا يمكن استعمالها لأهداف تجارية تبغى الربح.

لاستعمال المواد على صفحتنا الالكترونية، من ضمنها التاريخ الشفوي والصور المرافقة نطلب منكم التنويه بورشة المعارف كمرجع باستعمال: اسم الحكواتية، قابلتها اسم الباحثة، السنة، مشروع الحكواتيات، ورشة المعارف، بيروت، لبنان، الصفحة. [مثلاً: نازك سابا يارد، قابلتها ديمة قاندييه، ٢٠١٧، مشروع الحكواتيات، ورشة المعارف، بيروت، لبنان، ص. ١٢]

لاستعمال المواد المحددة للاستعمال الموجودة في ورشة المعارف (الغير متاحة على صفحتنا)، يمكنكم القدوم الى مكتبنا في فرن الشباك وتعبئة استمارة الطلب. بالإمكان استعمال هذه الموارد داخل ورشة المعارف، لكن نسألكم ان تستشيرونا عن أي مواد يمكن استعمالها. بعض هذه المواد تتطلب طلب من الحكواتيات قبل استعمالها.

نسرين رجب [00:00:02]: مرحبا أنا نسرين، اليوم الخميس 23 أيار 2019، أنا في مكتبة ثانوية النبطية الرسمية للبنات في كفرمان. عم أعمل مقابلة تاريخ شفوي، لصالح ورشة المعارف، مع الدكتورة دلال عباس. شكراً دكتورة على المقابلة. أول سؤال بتخبرينا عن مسار حياتك منذ الولادة، يعني اسمك، وبن خلقتي--

د.ع. [00:00:25]: أنا دلال عباس، من مواليد 1947 بضبعة اسمها كوثرية السيد، مش بعيدة كتير عن النبطية يعني، لكن هناك ولادتي. أمي من قرية النميرية، ووالدي من كوثرية السيد. كان أبي يعمل تاجرًا في النبطية، ويذهب كل أسبوعين مرّة إلى الضبعة وأنا تعلمت في قريتي، يعني في كوثرية السيد حتى السابعة والنصف من عمري.

ن.ر. [00:00:58]: عشتي كل عمرك بالضبعة؟

د.ع. [00:01:02]: لصار عمري سبع سنين ونص، لما صار عمري سبع سنين ونص، كانت المدرسة، كان معلم المدرسة لا يعرف الفرنسية، فحين أصبحت في السابعة والنصف من عمري، وكان معلم المدرسة قريب أمي، ففكرت أمي إنه إذا، لو إنني صدي كانت أرسلتني إلى النبطية لأتعلّم مع جدي ووالدي. لكن بما إنه بنت، بعد المدرسة، أين سأقضي الوقت وحدي وأنا طفلة؟ ففكرت أن تأتي. كانت بانتظار أن ينتهي بناء البيت الذي وعدوا به، ولم ينته البناء، فأنت بثلاثة أطفال، وأنا وأخي الأصغر مني وطفل عمره سنتين إلى النبطية، من أجل أن تُدخلني في المدرسة. أدخلت في النبطية، عشنا بالنبطية يعني حتى هذا الوقت.

ن.ر. [00:01:59]: كيف بتوصفي طفولتك، أقدم ذكري لك، بالمكان مطرح ما خلقتي؟

د.ع. [00:02:06]: بالنسبة لطفولتي في القرية، أتذكر إنه كيف كنا نذهب إلى المدرسة، هذه المدرسة غرفة واحدة، معلم مدرسة ذات معلم منفرد، بما معناه إنه أن يكون معلم منفرد يعني كل الأطفال يأتون إلى المدرسة بأعمار مختلفة ومعلم واحد يعلم الكبار، ويستمتع الصغار إليه، أو يعلم الصغار ويستمتع الكبار. هذا، يعني المدرسة شبيهة بالكتاب، وهذا يعطينا فكرة، كيف أن الجنوب، أنا أتحدث إنه المدرسة يعني بعد الـ 1953 تقريبًا، هذا يعطينا فكرة كيف أن الجنوب كان مهملاً، يعني صحيح إنه ضمّ إلى لبنان بعد الاستقلال، ولكنه كان مهملاً. يعني لم تكلف الدولة نفسها أن تبني مدارس مثلًا في القرى. كان أهل القرية يقدمون غرفة مجانًا ويذهبون إلى النائب ويقبلون بيده، ليتوسط لهم مع الوزارة لترسل معلمًا. هم يقدمون الغرفة والوزارة ممكن أن ترسل معلم وممكن أن لا ترسل. وأحيانًا في قرى كانت ترسل إليها وفي قرى لم ترسل إليها. ما أتذكره، لا أتذكر من الضبعة أكثر من هذا الأمر. أتذكر أحيانًا الذين كنت أذهب معهم إلى المدرسة، لكن أكثر من هيك، من هذا الأمر، يعني لا أذكرها. حين أتذكر، أذكر مكانًا في قريتنا، حين كنا نذهب إليه، كان يقولون إنه هذا حي المدارس، اسمه حي المدارس. حتمًا، وأنا صغيرة، لم احفظ ما كان يُقال لي، لكن هذا الحي أو هذا المكان ألي زال الآن، لكن في يومها، كان هو من 200 سنة كان في كوثرية السيد مدرسة دينية كبيرة، وهناك كانوا، يعني كان في مدرسة دينية وزالت معالمها حتى الآن، أتذكر المكان.

ن.ر. [00:04:34]: بتتذكري الشوارع، الطرقات؟

د.ع. [00:04:36]: نعم أتذكر سيدة عجوز—سيدة كانت كبيرة في السن وقرية أمي، كنت أذهب إلى بيتها، وأرى الكتب يومها، يعني هي مخطوطات، لم أكن أعرف ذلك الحين أن اسمها مخطوطات، لكن كنت أرى هذه المخطوطات، وكانت تقول لي، إنه أمك تقول إنك انت متفوقة إلى آخره. هذه الكتب، كتب زوجها العالم المتوفى، فكانت تقول لي هذه ستكون لك، تذكرت هذا الأمر بعد وقت طويل، حين بدأت بالأبحاث وأنا كبيرة في السن، وسألت عن أين ذهبت تلك الكتب، فقالوا إنه أقاربها أخذوهم، سألتهم، عن-- لا يهتمون، يعني هي مخطوطات قديمة، ولا— حتمًا لا أعرف محتواها، هذا الأمر يعود إلى سنين، لأنه غادرنا القرية، وكنت في السابعة والنصف من عمري.

ن.ر. [00:05:40]: يعني ما عشت قدرتي توصيلهن للمخطوطات؟

د.ع. [00:05:42]: عرفت يعني عرفت الذين أخذوهم من أقاربها، ليس— أولادها هي كانوا خارج لبنان. عرفت من أقاربها، عند من، لكن هم أنفسهم الذين أخذوا هذه المخطوطات، لا أعتقد إنهم اهتموا بها، ممكن أن يكونوا قد رموها يعني. يعني ليس كل من وجد مخطوطة إنه ممكن أن يجب-- أتذكر أحيانًا، يعني مرّة عملوا معي مقابلة عن أدهم خنجر، تذكرت، يعني تأتي الذكريات في أوانها. تذكرت رجل كبير في السن كان قريبًا من منزلنا، لأنه نحن حتى بعد أن أتينا إلى وعشنا في النبطية، كنا أحيانًا نذهب يعني أسبوع أو أسبوعين في الصيف، جدتي كانت، أيضًا جدتي كانت تنتقل بين النبطية وبين القرية، نذهب معها، وفي بيت رجل كبير في السن، وغير متزوج. وقالوا هو لم يتزوج لأنه كان من الذين قاتلوا الفرنسيين مع أدهم خنجر، وأيضًا حين، في مرحلة معينة، حين بدأت أبحاثي عن جبل عامل، فكرت أن ألتقي بهذا الرجل، كان كبيرًا في السن، ولم يعد باستطاعته الكلام، فضاعت الفرصة.

ن.ر. [00:07:09]: بتتذكري عادات معينة كانت تصير، لما كنتي بكوثرية السيد؟

د.ع. [00:07:15]: يعني أنا من الذين، أنا وضعت أمي في، ربّنتي بطريقة إنه أنا يجب أن أقرأ ليلاً نهارًا لأنه ساكون شيئًا، بمعنى، إنه هيدي أنا لم أكن ألتفت كثيرًا إلى أمور العادات والتقاليد. لكن ما أريد أن أقوله، إنه في مرّة وأنا في الثانوية، كان هنالك كلام على اللباس المحتشم، على العباءة، على لباس العباءة، على لباس غير العباءة. وأنا ذكرت، فتذكرت إنه النساء

في القرية كيف كنّ يذهبن إلى البركة أو إلى العين، ويحملن الجرار، ويأتون بالماء، وماذا كنّ يلبسن، مثلاً، الثياب التي كنّ يلبسناها، لكنّ أمور لم تترك عندي أثرًا ما.

ن.ر. [00:08:14]: في ألعاب كنتوا تلعبوها، يعني هلق بيختلفوا الألعاب

د.ع. [00:08:17]: أنا قليلاً، أنا قليلاً ما لعبت أصلاً. يعني صار الظروف لا أدري أيّ ظروف، لكن إنّه اللعب، أنا بدأت، أو جعلوني أبدأ المطالعة كنت في الحادية عشرة من عمري تقريباً بدأت المطالعة، فلم ألعب.

ن.ر. [00:08:36]: كان في حدا من عيلتك بيطلع؟

د.ع. [00:08:40]: أمي، أهلي كانوا يقرؤون.

ن.ر. [00:08:42]: كيف كانت علاقتك بأهلك؟

د.ع. [00:08:46]: أنا أساساً كنت فتاة، كنت دائماً، أهلي لإنّه كانوا يمدحونني كثيراً، وكنت الى حدّ ما ممكن أن أقول كنت فتاة طيّعة، ليس بالضرورة يعني طيّعة بمعنى طيّعة، ولكن كنت واثقة ممّا يقولونه لي. أطيع، مش طيّعة بمعنى طيّعة، أطيع والداي.

ن.ر. [00:09:15]: بتتذكري يوم توصفيلنا من حياة والدتك، كانت تقراً و---

د.ع. [00:09:19]: والدتي، إذا بذي أوصف يوم من حياة والدتي، قبل أن أصف يوم من حياتها، سأقول لك، لماذا أمي هي التي— ما وصلت إليه، أنا ودراستي ومتابعة دراستي سببه أمي. قلت إنّه أمي لو لم تنتقل أمي، تقرّر هي من دون أن تأخذ رأي أحد. أمي كانت امرأة مستقلة الرأي، كانت بالنسبة إلى عصرها، طبعاً متقدّمة جداً. بمعنى إنّها حين أنتت من قريتها، هي أهلها من علماء دين. كانت قبل أن تأتي إلى الـ إلى قرية زوجها، هي وعند أهلها، كانت من المخبات بمعنى كنّ لا يكشفن عن وجوههنّ، وكنا مثلاً لا يخرجن إلى العين، أو إلى الأعشاب. يعني بيتعلّموا البنات بيتعلّموا القراءة والكتابة وبيقروّوا، وبيتقنوا بيحكوا وبخيطوا. هيدا كان عملهن. كانت تغطّي وجهها. حينما تزوّجت أبي، وأنتت إلى القرية، وجدت أنّ حمايتها وكلّ نساء القرية لا يغطّين وجوههنّ، فقالت إنّه هيّي ليست أفضل منهنّ. بمعنى إنّه لتكون، هيّي عندها، عندها هذا كان منذ أن كانت صغيرة، هذا الحسّ بالمساواة الاجتماعية. بمعنى إنّه لماذا ستكون، كانت تشعر إنّه هؤلاء المخبات هيّي مميزات عن غيرهن، يعني لا يخرجن إلى الحقل، إلى آخره. كلّ بنات ونساء رجال الدين، فقالت إنّه هيّي ليست أفضل، بهل المعنى، من هذا بهذا المعنى. هي كشفت وجهها لكن يعني كانت كانت تلبس طبعاً لباس طويل وتغطّي جزءاً من وجهها. لكنّها حين أنتت إلى القرية، أوّل شيء عملته، إنّه حوالي 50 رجل تقريباً، يعني كانت كانوا يقولون إنّه هي التي علّمتهم كيفية الصلاة مثلاً بشكل صحيح. علّمت بنات القرية، بنات ليس الصغار، التي من عمرها تقريباً، إمّا القراءة والكتابة وإمّا الحياكة مثلاً والتطريز. وفي سيدة، كانت اشتغلت خياطة وأعالق عائلتها من وراء الخياطة، هي التي علّمتها الخياطة مثلاً، كانت تقوم بهذا الدور. وهي في القرية، بهل السنوات التي قضتها في القرية لم تكن تقوم بأعمال منزلية أساساً. كانت تقوم، لإنّه هنالك كثر أو كثيرات في خدمتها، هي قرّرت من أجلي أن تأتي إلى النبطية، لإنّه قالت إنّه لو إنّها صبي كانت ممكن إنّه والدي كان عنده متجر في النبطية، قالت لو إنّها صبي، كان ممكن أن تأتي وتلعب في المتجر بعد المدرسة، لكن هذه البنت الصغيرة ماذا ستفعل بعد المدرسة وأين ستذهب؟ فأخذت قراراً من دون أن تقول لأحد أو تستشير أحد. يعني هيّي دائماً كانت مستقلة وقراراتها ممكن أن تُنفذ على الآخرين، وليس ولا تُنفذ هي قرارات أحد. المهم، حملت هؤلاء الأطفال الثلاثة والثياب وأنتت إلى النبطية، إلى بيت لم يكن مكتملاً مع إنّها كانت كما قلت من قبل امرأة مخدمة، ثلاثة أطفال. لم أعرف أنا هذه القصة، هذا السبب مرتين، لأقول يعني هنا ممكن أن أتحدّث عن دور أمي في حياتي. مرتين. عرفت فيما بعد ماذا جرى. مرّة كنت أنا في الصف الثاني متوسط. كانت الطريق في الثاني متوسط، في المدرسة الرسمية في النبطية. أنا اتعلّمت في المرحلة الابتدائية في مدارس مدرسة المقاصد، حين بعد ال 58 ال 58، جعلوا عزّبوا المواد. فأخذني أجدوني إلى، سجلوني بالمدرسة المتوسطة الرسمية. المدرسة المتوسطة الرسمية كنت صغيرة جداً بالنسبة إلى بقية البنات. يعني أقرب تلميذة ممكن أكبر مني بسنة واحدة، كان في تلميذتين أكبر مني بسنتين، بسنة أو سنتين، لكنّ باقي التلميذات كبيرات في السن. والمدرسة بعيدة عن بيتنا. وكانت طرق التعليم، كان أستاذ الرياضيات والعلوم جيد جداً. وكان أستاذ اللغة العربية. لكن بالنسبة إلى اللغة الفرنسية، لم-- صادف أن معلّمة مثلاً من المعلمات في السنة الثالثة المتوسطة، أتذكر إنّه علّمتنا طول السنة درس، درس أو درسين قراءة فرنسية وموضوع إنشاء واحد. كان في موضوع إنشاء للبريفيه، وكذلك في صف البريفيه. يعني تراجع تراجع مستوانا. المهم، في علاقة هذا الأمر بأمي بمعنى إنّه أمي مقرّرة أن أبقى أنا الأولى على الصف. في حفظ التاريخ والجغرافيا. لم يكن الذين كانوا يدرّسوننا التاريخ والجغرافيا، لم يكونوا يدرّسون، حتّى الآن الذي يدرّسون هذه المادة لا يدرّسونها بشكل صحيح أو سليم، أو إنّه أن يفهم التلميذ. المهم كان يجب أن أحفظ الدرس غيباً. وأنا، في يوم كانت أمي تريد أن تذهب إلى مكان ما فطلبت مني لأوّل مرّة، كنت في الثانية عشرة أو الثالثة عشرة من عمري، في الثانية عشرة يمكن كنت في الصف الثاني متوسط ثاني متوسط. طلبت مني أن أكنس غرفة، الغرفة التي، غرفة الجلوس وذهبت. وقالت لي إنّه ستعطيني أجرًا. فلأوّل مرّة بحياتي مسكت المكينة، لاكنس الغرفة، وجدت إنّه أهون أسهل بكثير من درس التاريخ. فأكملت كنس البيت كلّه وحتّى الساحة، لكيلا أحفظ درس دروس التاريخ. لا أذكر إذا كان درساً واحداً أو كان امتحان. المهم حين عادت أمي ووجدت هذا البيت كلّه نظيف، وهيك، فأعطتني مبلغاً من المال. قلت لها يا أمي، كان بيت خالي قريب منّا، وابنة خالي أكبر مني بسنتين

ولا تذهب الى المدرسة، وتساعد أمّها في المنزل. فقلت لها "يا أمّي يا حبيبتي، لأبقى أنا بالبيت ومن دون المدرسة، ريّحيني من المدرسة. وأنا كل يوم، مش بس بكنس، بشتغل كلّ الشغل مثل بنت خالي". فأخذت منّي المبلغ الذي أعطتني إياه وقالت إنّه "أنا لم آتي الى النبطية، ويعني أعيش هذه الحياة الصعبة لوحدي من دون ما حدا يساعدني كرمالك. أنا جيت كرمالك، مش لحتيّ تكوني، مش لحتيّ علمك الكناسة، والكذا". وأخذت منّي مبلغ المال، حتمًا وأنا في ذلك الحين، في ذلك العمر، لم أكن أدرك معنى كلامها. أدركته بمرحلة متأخرة. حدثت قصة قريبة، كنت أنا وقتها، يعني عندي ولدين، وكان حين بدأت، بدأوا يلعبون بالدولار وبرواتبنا ووصلت رواتبنا إلى أدنى مستوياتها، وإلى أدنى مستوى بالثمانينات، في بداية الثمانينات أو -- والمهم، ففي يوم أنا ذهبت لزيارتها، ولم أكن، وقلت أمامها لإنّه أنا متعبة جدًا لإنّه اشتغلت اليوم كلّ البيت وأنا شطفت ونظّفت وما يعرف شو. أيضًا صرّخت وقالت إنّه "أنا لم آتي من الضيعة إلى هنا وأعيش لوحدي وأتعدّر (بمعنى هيدي بالعامية) أتعدّر كرمال بنتي تصير أو أديبة أو وزيرة مش لفاية، مش لفاية لفاية يعني بمعنى هيدي المرأة التي تشتغل بالبيوت--". يعني دائمًا كانت تكرر، ومرّة قالت لي مرّة، حين وجدت، حين تذهب الى منزلي وتجد إنّه أنا عمليًا بهتم كثيرًا بتنظيف المنزل. والاهتمام بالشكل و-- المهم، مرّة وجدنتي وأنا أقف على السلم وأنظف نيتة معرّبة على الحائط داخل غرفة الجلوس، فقالت "هل قرأت في أيّ كتاب قرأت وجدت اسم امرأة خلّدها التاريخ لإنّها تجيد تنظيف المنازل؟". لا يعني إنّها هي كانت لا تعمل، أمّي الآن أعود لأقول لك، أمّي هذه ماذا كانت تعمل؟ أمّي أولًا نحن ثمانية، أنا الكبيرة بعدي خمسة ذكور، وبعدها بنتين. إخوتي-- يعني أنا أستاذة في الجامعة، أخي أيضًا دكتور وهو عميد متقاعد، وأخ مهندس كمبيوتر، 3 مهندسين وطبيب. والبنين لأصغر كمان وحدة أستاذة تعليم ثانوي فلسفة، وأستاذة كيمياء. يعني الكلّ متعلّمين. أمّي كيف كانت؟ من دون، قليل، المساعدات قليلة لكن كانت تطبخ وتسجّل في المدراس وتتابع تعليم. تتابع التعليم من درّس ومن لم يدرس. حتّى إنّي وأنا صغيرة، وأنا وأخي الكبير، كنا نظنّ إنّها تعرف الفرنسية، وهي لا تعرفها لإنّه تقول، هي كانت تعرف اللغة العربية فقط، كانت تقول "اقرأ صحّح غلط". نظنّ إنّها تعرف وهي لا تعرف. ولكن يعني كانت تشرف على الدراسة. إشرافها على تعليم إخوتي، مثلًا أعطي مثلًا من حياتها. كانت أولًا ممنوع ممنوع هم يذهبون للدراسة عند رفاقهم، هم يأتون بالرفاق إلى المنزل. في سنة من السنوات، هذه لا يمكن أن تضع من البالي، لإنّها هي مرضت يمكن من كثرة ما عملت باكرًا. في سنة من السنوات، كان عندها كان أحد إخوتي، واحد بصف الماتيلام [Mathélème]، واحد بصف البكالوريا قسم أول كان في امتحان رسمي، واحد بصف البريفيه. كل واحد معه، حوالى يعني مجموعة من رفاقه. كانوا قبل الامتحانات الرسمية، يبحلوا رياضيات مع بعضهم. فكل واحد بطابق، واحد على السطح مع رفاقه يدرسون، واحد بالطابق النصف في لوح لوح على الشرفة وهذا اللوح مفتوحة الأبواب ويتطير الطباشير في جميع أنحاء المنزل وممنوع حدا أن يقول لهم إنّه وسختوا. فالمهم يدرسون. واحد بالطابق الأرضي معه الي بالبريفيه في الطابق الارضي، وكانت أمّي تصنع غذاءً لهؤلاء لهؤلاء لهذا الجيش من الطّلاب. المهم إنّها ترى أن أبنائها يدرسون، يدرسون مع رفاقهم لإنّه هي ستبقى إن درسوا مثلًا عند الرفاق، كانوا يقولون إنّه مزروح بالدور، مزريحك ومزروح لعند حدا ثاني. تقول هيّ مش متأكدة، إنّه هذا أمّه غير مهتمة، وذاك هي تعرف أهلهم، كلّهم لم يكن باستطاعتنا أن نأتي الى البيت بصديقة أو صديق لا تعرف أهله. يعني دائمًا هي كانت تريد أن تعرف من أهل هؤلاء الأطفال، وهي كانت منذ أن كنت طفلة كانت أمّي تقول "الكرة الأرضية على إبهام الأم". فنفجّجني يعني حين تجد ولدًا مهذبًا وأمّه وهي تعرف أمّه إمّا جاهلة أو لا تعجبها، تقول إنّه غريب هذا الولد، إنّه كيف كيف هو، يبدو يبدو إنّه، تقول يبدو إنّه مهذب. لكن تحت نظرها، لإنّه إذا درس عنّا بالبيت وتحت نظرها فمسموح. بالنسبة إلى اللعب، يعني حتّى إخوتي الصبيان، أنواع اللعب، ما كان هيك. كانوا عادةً الصبيان كانوا يلعبوا بشي على الطرقات اسمه الغلّ، فقليلًا ما سمحت لهم. بالنسبة إلى المطالعة، أنا مثلًا، يعني كنت في الحادية عشرة أو قبيل الحادية عشرة تقريبًا، بأول السنة الأولى المتوسطة. أحضرت من، كان في النبطية مكتبة اسمها تابعة للمركز الإنجيلي، مكتبة عامة، فأتيت بقصة من المكتبة لجرجي زيدان، فأبي ذهب إلى بيروت واشترى لي كل مجموعة جرجي زيدان. يعني هيدي المجموعة، هو أول أول قصص قرأتها خارج البرنامج المدرسي، هي قصص جرجي زيدان وبعمر مبكر. لكن متي، كان بالنسبة إلى الدراسة، لم يكن هنالك مشكلة، يعني لم أكن بحاجة لأن يقولوا لي ادرسي أو لا تدرسين حين. لكن كنت أعطي نفسي بعد كلّ امتحان أو بعد، بالأوقات، أعطي نفسي إجازة أو فرصة أو أكافئ نفسي بقراءة رواية. استمرّ هذا الأمر إلى أن بعد مرحلة الدكتوراة، يعني بمرحلة الدكتوراة أوقفت قراءة الروايات. فيما بعد قليلًا ما قرأت لكنّ من الأول متوسط وحتّى نهاية المرحلة الجامعية، إليّ هويّ مرحلة ليسانس [Licence]، وأنا حين يكون لديّ وقت أو حين أنجز عملاً ما أكافئ نفسي بقراءة رواية، يعني الرواية بالنسبة لي إليّ كانت نوع من المكافأة.

ن.ر. [00:25:03]: يعني تأثرتي بوالدتك فينا نقول.

د.ع. [00:25:06]: يمكن، من الممكن إنّه هذا التأثير، الآن يشعر الانسان بمن أثر فيه بشكل مباشر. ليس من الضروري أن أكون قد تأثرت فيها مباشرة، لكن أقول، حتمًا يعني هذا التأثير، لكن أنا أقول لولاها لما تعلّمت. يعني لو أنّها ظلّت في القرية، وحتّى لو كان، لم يكن أبي فقيرًا كي لا أذهب الى المدرسة، في القرية والمدرسة غير مؤهلة. وبنات القرية لا يتعلمون، أو غير مسموح. لو إنّه بقيت في القرية، أو أبقتني في القرية، لو لم تأت بي لما تعلّمت. يعني بمعنى الذين تعلموا من قريتنا هم الذين عاشوا خارج القرية. أمّا في القرية لم تكن فيما بعد لأنشئت المدراس وأنا أقول وأعيد القول إنّه دائمًا هذا هو اللّي حفزني

فيما بعد، لما أدركت هذه الامور لأشعر من الناحية السياسيّة عملياً الى أيّ حدّ أنا كنت في منطقة مهملة، كمايها ليست جزءاً من لبنان.

ن.ر. [00:26:15]: بتندكري أول مرة مثلاً عملوا مدارس هونيك، غير مدارس الكتاب؟

د.ع. [00:26:20]: لأ، هذه هي مدرسة، ما دخلته، هي مدرسة، ولكن هي غرفة. منذ منذ البداية لم يكن هنالك نيّة لدى الحكومة أو ان تكون حكومة بمعنى الدولة، الدولة عادة، الدولة هي ترعى تخطط وترعى شؤون أبنائها. هي الدولة الأمّ، الدولة هي أمّ، هذه الأمّ لم تكن أمّاً مسؤولة، منذ مرحلة الاستقلال. يعني عندها أبناء حرائر وأبناء جوارري. يعني في مناطق، هنّي ولاد الجوارري، منطقة الجنوب كنت أعرف بالأوّل بس منطقة الجنوب، فيما بعد طبعاً عرفت كمان بمنطقة البقاع أو عكار مثلاً، إنه هول أبناء الجوارري، في أبناء، كانت دولة في المدن. بالمدن كان في المدارس الخاصة كانت متوافرة. يعني حتّى في النبطيّة كان في، فيما بعد كان في مدرسة راهبات وفي مدرسة إنجيلية ومدرسة المقاصد. يعني منذ البدء لم تتولّ هذه الدولة، لم تأخذ على عاتقها لا تربية، لا تربية مواطنيها، ولا أقلّه أن تُنشئ المدارس، ما في مدرسة من دون استثناء بأيّ قرية في الجنوب أنشأتها الدولة هكذا بملء خاطرها، وإنما يسعى الأهالي، أو عند النائب ويقدمون الأرض مجاناً. كان بالماضي يقدمون الأرض ليس الأرض، لا تبني، يقدمون غرفة مبنية أو غرفتين أو ثلاث غرف. فيما بعد تتحول هذه الغرف إلى مدرسة أيضاً ممكن بالواسطة أيضاً من دون تخطيط. لأقول لك شيئاً، ما كان كانت القرية تقدّم المبنى اللّي هو غرفة أو غرفتين في البداية، ويرسلون، يعني كمن لديه شيء ويطلب يشحذ يشحذ، يعني كأنه تتخيلّي الصورة، إنه هم يقدمون غرفة ويشحذون معلماً من الدولة، يعني هكذا كانت في نيّتي. ولذلك منذ البداية كان عندي هذا الإحساس أنا إحساس بعدم العدالة، فضلاً عن إنّي أنا، كما هنالك سؤال يمكن إنّه وجهتيه من قبل عن القراءات أو إذا كانت في تربية دينيّة أو غير ذلك. حتماً نحن في منزلنا تربيانا تربية دينيّة ولكن غير مترتبة. بأيّ معنى، هذا ما قلته. يعني أمّي كانت محبّبة لكن أمّي كانت تعظ الرجال، كانت تجتمع وهي تغطّي نصف ذقنها مثلاً ودائماً عندها إحساس كانت إنّه هي أدكي وأشطر من هل مجموعة يعني. فلم تكن هذه-- وأبي كان يقول عنيّ منذ أن كنت في المرحلة المتوسطة يسألونه مثلاً إنه تكمل دراستها أو لا تكمل، كان يقول بيت المتنبي "ولو كنّ النساء كمنّ فقندا، لفضّلت النساء على الرجال". يمكن أنا حبيبت المتنبي كنت أعشقه منذ أن كنت صغيرة من أجل هذا البيت. نحن في بيتنا كان دائماً أبي يتحدث عن عليّ بن أبي طالب، وعنا نهج البلاغة في البيت، وكانوا يطلبون إلينا أن نحفظ الحكم والوصايا من عليّ بن أبي طالب. الدّين بالنسبة إلينا كان هذا النمط من الدّين، يعني العدالة المطلقة، يعني نموذج المتديّن يجب أن يكون نموذج عليّ بن أبي طالب. الحاكم الذي لا يأخذ من بيت مال المسلمين، الحاكم الذي يعني بمعنى الحاكم العادل القاضي المجتهد. منسّميه مجتهد بالنسبة إلى الدّين. يعني لم يكن الدّين بالنسبة إلينا، أنا بالنسبة إليّ على الأقل، ولا في منزلنا، وبالنسبة إلى اخوتي جميعاً، لم يكن الدّين عائقاً في وجه حركتنا. كان الدّين، كما قلت، كما دعي، كما فهمه الإسلام، دين الإسلام، كما فهمه عليّ بن أبي طالب. وأنا حين درّست فيما بعد أدب صدر الإسلام في الجامعة، وكنت أدرس نهج قسم من نهج البلاغة كنموذج للنثر في عصر صدر الإسلام، وأعطي خطباً للإمام عليّ، درّست التلامذة الطلاب خطبة، رسالته إلى مالك الأشر، الذي عيّنه والياً في مصر. ومنذ ذلك حين، أنا قلت للطلاب وكتبت حول هذا الموضوع، إنّه أهمّ أهمّ حاكم في التاريخ، أهمّ، هو أهمّ حاكم في التاريخ، أعدل حاكم في التاريخ. غير هيك، النصّ، هذه رسالة عليّ الإمام عليّ بن أبي طالب إلى مالك الأشر واليه على مصر، كيف يجب أن يتعامل مع المواطنين، على اختلاف طبقاتهم. لا يمكن أن تجد نظاماً عصرياً، عادلاً أهمّ من هذا النظام. هذا هو بالنسبة لي الدّين. ولذلك كان منذ البدء عنّا، يعني في حين تأتيني تساؤلات حول بعض الممارسات كنت أسأل أمّي، حين كنت قبل أن أتمكّن بنفسني أن أجيب عنها، كنت أسأل أمّي عن بعض الأمور، فنقول هذا هذا للعوام. كلّمنا سألناها عن شي تقول للعوام. حتّى بالنسبة إلى العادات والتقاليد، بالنسبة إلى عاشوراء. مثلاً هي حين أنت إلى النبطيّة، جاءت سيدة تقرأ مجالس تقرأ عزاء، فلم يعجبها قراءتها. لم تقل لها، لم تفشلها قالت لها إنّه "كم يعطونك في آخر محرّم؟". يعني تقرأ المرأة في البيوت في المنازل، هي المرأة شبه أميّة، لكن صوتها جميل وتنوح على الإمام الحسين. سألتها إنّه "كم تأخذين في نهاية المحرم، في نهاية العاشوراء". قالت لها كذا. يعني حدّدت لها المبلغ، قالت لها آخر يوم بنشرفي، وتأخذين ما تريدين. أنا بعرف أقرأ، فأخذت هي لتتقّف نساء حارّتها، الكبيرات في السن، اللّي أكبر منها سنّاً. تقريباً في كم بيت، عدد البيوت، المنازل قليلة. وكانت تقرأ لهم كما كانت تقرأ لنساء القرية مجالس عاشوراء، حتّى مجاناً طبعاً، مش لإته عندك بأجر، من المجالس الحسينية للسيد محسن الأمين التي تخلو من الأسطرة ومن أي شيء آخر. هي تقرأ المجالس وكان صوتها شجياً حين تقول، وظلّت تقرأ لأهل الضيعة، لنساء الضيعة في عاشوراء. نذر دائم هذا، إنّه تذهب إلى الضيعة وتقرأ لهم المجالس كي-- فيما بعد صاروا، طبعاً حين بدأت ال، بدأ هنالك من يقرأ أو القارئات بأجر، تغيّر الوضع. وأتذكر إنّه مرّة كنّا نحضّر أسبوع شخص قريب أبي، وسمعتُ قارئاً العزاء تقرأ شيئاً، شيئاً أسطورياً، تقول قصة لم تعجبني، فقالت-- سألتها عاتبت أمّي، إنّه كنت موجودة ولم تعلق؟ قالت بالمجموعة، لا، غلط مجادلة-- قالت لي احفظي هذا الدرس بعد التجربة. وهذا كان معها حق، لأنّه وقعت أنا في مازق فيما بعد بسبب مباشرة أعطي رأيي وخاصةً بالأمر الدّينيّة، قالت لي لا تجادلي العوام.

ن.ر. [00:35:08]: العوام يعني عامة الشعب؟

00:35:11- د.ع. - [00:08:36]: العوام يعني-- مش عامة الشعب، العوام بمعنى يعني الذين يسرون هيك على التقاليد على العمياني وهم لا يعرفون أساساً الدين. قالت "لا تجادلي العوام"، وكانت تقول إنه الإمام علي عليه السلام قال، هيدي كانت ترددها دائماً: "ما حجبت عاقلاً وإلا غلبته وما حجبت جاهلاً إلا وغلبني". يعني هذا الأمر. ومرة أنا انتقدت، مرة ثانية، انتقدت أمامها إحدى الممارسات، لم يكن علنياً انتقاد ممارسات التطبير في عاشوراء بالنبطية خاصة، هبي لم تكن موجودة إلا في النبطية، عادة التطبير.

ن.ر. [00:35:53]: بتتذكرني أول مرة ظهرت فيها أو هبي كانت موجودة من قبل؟

د.ع. [00:35:57]: لأ، عادة التطبير أتى بها رجل إيراني، هو والد الدكتور ميرزا، كان في دكتور اسمه من بيت ميرزا، بيتهم في السوق، بيتهم جميل بجانب السرايا. بيت جميل جداً، والده كان أيضاً طبيباً، وأتى في بداية القرن، تقريباً 1900، بالعيشريات. يعني لا أذكر بالتحديد في أي سنة، لكن في هذه المرحلة أتى الأب وهو الذي أدخل هذه العادة، وشيخ النبطية فيما بعد. لكن نحن مثلاً في بيتنا، مرة أحد، كل أبناء النبطية الصغار المتدينين وغير المتدينين كانوا يضربون كانوا يطبرون في عاشوراء يتبارون والأطفال يغارون من بعضهم. لكن نحن لم تسمح، في مرة يمكن أحد إخوتي قال إنه-- قائلته حرام، هبي قائلته حرام. بيتناجوزوا الناس بأرائها هذه المبكرة. أنا لما قلت، إنه مرة انتقدت التطبير في مكان عام وقامت الدنيا ولم تقعد، ذكرتني قالت لي "أنا منذ سنوات قلت لك، إنه لا تجادلي العوام".

ن.ر. [00:37:28]: طيب—بتتذكرني إنه؟ كيف كانت مراهقتك مثلاً، كنت تظهري تروحي؟ كنتي عشتي بالنبطية بعدين إنتي. إنتي عشتي بالنبطية بعدين، يعني ما عشتي بالضبعة؟

د.ع. [00:37:39]: من سبع سنوات

ن.ر. [00:37:40]: بتتذكرني كيف مراهقتك كانت، كنتي واعية مثلاً بالتغيرات اللي بتصيب البنت، أو كانت إشيا عابرة؟

د.ع. [00:37:46]: كان شي طبيعي، مش هيدا الشي، عابر يعني، ما كانت هذه الأمور--

ن.ر. [00:37:52]: ما كنتوا توقفوا عندها--

د.ع. [00:37:54]: ما كانت لافتة، يعني معروف كانوا البنات يسألوا بعضن، إنه إنتي صغيرة أو غير صغيرة، إنتي بلغتي أو ما بلغتي؟ عندك؟ بدأتي تلبسي الصدرية مثلاً أو غير ذلك؟ بس إنه أمور عادية جداً كانت. من أقاربي مثلاً بنات تزوجن مثلاً في الخامسة عشرة من العمر. أنا أمي مثلاً، أنا أمي كانت تقول، أول مرة، أذكر لأنه خالي كان عندي خال يحبني كثيراً، "يتفرق" يعني يأتي بالعرسان إلى المنزل. فمرة قالت له إنه لتنتهي الجامعة وكنت أنا، فصرخ إنه هبي بال هيك، يعني قال لها "هبي معلمة وعملت! من وين اختر عتيلنا هيدي قصة الجامعة؟!". يعني بهل معنى. لكن هذا أمر كان بالنسبة إلينا، شيء طبيعي. كانت، في هنالك أمر مهم جداً، يعني حتى أنا حين كنت، حين أحد يعني من رفاقي أولاً أنا لم تكن، بالمدرسة المتوسطة التي درست فيها، المدرسة الابتدائية كانت مختلطة، المدرسة المتوسطة كانت بنات. لكن أنا أدخلت وأنا في الخامسة عشرة من عمري إلى دار المعلمين في صيدا. دار المعلمين هو أغني مرحلة في حياتي، من الخامسة عشرة حتى الثامنة عشرة. أولاً دار المعلمين كانت البرامج في ذلك الحين برامج متنوعة جداً. يعني، كذا ندرس إلى جانب نصف تقريباً برنامج البكالوريا، بجميع المواد—نصفه، لكن مع هذه المواد كذا ندرس باللغة الفرنسية علم الاجتماع، علم المنطق، القانون-- الاجتماع والمنطق والقانون، وعلم نفس الطفل. وكلها باللغة الفرنسية. وحتى كان هنالك معلمة أيضاً تأتي وتعلمنا الطرق، طرق الحياة، الحياة المرتبة أو التدبير المنزلي إذا ممكن أن نسميه هذا. ورياضة بدنية وموسيقى وكل هذه المواد المتنوعة. هذا بالنسبة إلى دار المعلمين، وأنا درست مع دار المعلمين البكالوريا والفلسفة. الآن إنه ماذا كنت أفعل وكنت أتسلى. أصلاً لم يكن لدي وقت فراغ. يعني منذ أن كنت في الخامسة عشرة وأدخلت دار المعلمين كان أيام العطلة البنات يتلهين. أنا يجب أن أدرس، لأحضر للبكالوريا القسم الأول، وفي السنة الثالثة يجب أن أحافظ على درجتي بدار المعلمين وأنا أدرس بصف الفلسفة. وفي الثامنة عشرة بدأت في نهاية الثامنة عشرة بالتدريس، وأنا بعد الظهر أذهب إلى الجامعة وأيام العطل يجب أن أدرس للجامعة وأيضاً أحياناً يجب أن أرتب المنزل. لأنه لم يكن مطلوباً مني أن أعمل في المنزل، ورايي بعدي 5 صبيان كان. لم يكن مطلوب مني أن أعمل في المنزل لكن كان يجب أن أرتب لأنه هنالك فوضى فوضى في البيت وعائلة كبيرة وأمي وحدها، هي لا تطلب مني ولكن أنا كنت أشرك ببعض الأعمال مع الدرس مع التعليم ومع الدرس—مع الذهاب إلى الجامعة. وبالصيف المواد التي لا أستطيع أن أقدمها في حزيران بالجامعة أقدمها في تشرين. فإذن أساساً في حياتي لم يكن لدي وقت فراغ، بعد ذلك وأنا في التعليم الثانوي، يعني أنا درست في المدرسة النموذجية أيضاً أنا درست في المدرسة النموذجية التابعة لدار المعلمين في النبطية. كنت أعطي دروس، اختاروني لأن أقدم دروس نموذجية لطلاب الدار. ثم تطور هذا الأمر، وباتوا باللغة الفرنسية، ثم تطور الأمر وباتوا يجمعون كل شهر مرتين معلّمي اللغة الفرنسية في كل قضاء النبطية وأعطيت الدرس على المسرح، صفّ الأحد، صفّ من صفوف المرحلة الابتدائية على المسرح أمام المعلمين. وأيضاً هذا الدرس يحتاج إلى تحضير وأنا كنت سعيدة به لأنه أصبحت نجمة في ذلك الوقت بالنسبة للمعلمين أعجبتني هذا الدور. يعني الدور الذي رسم لي لم أرسمه أنا، أقول صراحة إنه هذا الدور الذي رسم لي أدبته بشكل جيد وحتى يعني فيما يتعلق، لا أقول إنني اخترت حياتي، مثلاً اخترت المسار. طبعاً ابنة الخامسة عشرة ليست هي التي تحدد مسارها بالتعليم، لكن أدخلوني، نحن في النبطية صحيح إنني

كنت متفوقة لكن ماذا يمكن كنت؟ حتى الثانوية كانت جديدة يعني في النبطية، إنه دخلنا مباراة. رفيقاتي، أنا الوحيدة التي نجحت لأنه كان في ضعف في اللغة الفرنسية. وأن نذهب الى صيدا، كنت أتحدث عن دار المعلمين الغنى. هذا الغنى من الناحية، تحدثت عن غنى برامج الدار من الناحية الدرس والبرامج. اللي أغنى من ذلك، إن دار المعلمين، في دار المعلمين البقيت، يعني كنا بالنبطية من نوع واحد. يعني كل الناس مسلمين شيعية. لكن في دار المعلمين الابتدائية في صيدا كنا، كان من مختلف الطوائف والمذاهب، وصار عنا أصدقاء. يعني نحن باكرًا كنا نعيش حالة، كنا إما معارضين، بمعنى أنا بدأ تفكيري السياسي في دار المعلمين، كنت بالخامسة عشرة. كنا إما أن مجموعة نُضرب ونطالب الدولة يعني نسير بالمظاهرات وإلى آخره من مختلف الطوائف، ما كان في تحزب، بمعنى إنه هذه مجموعة، هؤلاء مثلاً شيعية، بقدهم وقديدهم مع هذا الزعيم، أو هؤلاء السنة بقدهم وقديدهم مع هذا الزعيم، أو دروز أو غير ذلك. كان معنا، كان في شيعية وسنة ودروز ومسيحيين من مختلف المذاهب أيضًا يعني لأنه من كل المنطقة، بصيدا كان هوي في الجنوب دار المعلمين الوحيد. بعد أن تخرجت أنا من دار المعلمين بسنة، فتح دار المعلمين النبطية بعد ان تخرجنا من صيدا. المهم أيضًا هذا الغنى. يعني رفاقنا من مختلف المذاهب. وكان أمر طبيعي. كان نقاشنا ليس على الدين ولا على المذهب إطلاقًا. كان نقاشنا، وقتها كان في عروبة، وغير عروبة، في عبد الناصر، في فلسطين، في الجزائر وفي ناس ضد. يعني بمعنى إنه نسير بالمظاهرة، وأحيانًا حتى المعارضين، حتى الذين لا يهتمون بهذه الأمور يأتون ويمشون بالمظاهرة معنا، هذا أغنى تجربتي. لما درست أنا أيضًا في ثانوية الصباح، ثانوية الصباح كانت هي الثانوية الوحيدة، بال 22 - 23 من عمري بعد أن أنهيت الإجازة، درست في ثانوية الصباح. أيضًا ثانوية الصباح كانت مختبرًا. مختبرًا بمعنى أولًا كانت هي الثانوية الوحيدة في المنطقة كلها. كان فيها التلاميذ من مختلف المذاهب والطوائف والطبقات. يعني ما كانوا الأغنياء يذهبون، يعني قبل ذلك في المرحلة التي أنا كنت فيها طفلة، الاغنياء كانوا يأخذون أولادهم إلى خارج النبطية داخلي، يدرسوا داخلي. ما كانت تتاح الدراسات العليا لأبناء الفقراء، لكن في المرحلة بالسبعينات، الثانوية كانت لكل ال كنت تجد أغنى شخص بالنبطية وفقر شخص بصف مع بعضهم. هذه من الناحية، من ناحية ثانية، أيضًا كان في من مختلف المذاهب لأنه يأتي إليها الطلاب من منطقة مرجعيون، من مناطق، من كل المناطق. يعني عنًا بالصف، كان بالصف، وهيدي كانت أغنت أغنت تجربتي كثيرًا. صف تلاميذ المرحلة الثانوية كلهن، يعني كنا ندرس سنة الأولى ثانوية وسنة ثانية ثانوية البكالوريا وكان في امتحان رسمي. أيضًا كانوا من مختلف المذاهب، وأحيانًا تقوم القيامة بينهم ولا تقعد، بمعنى إتهم بتناقشون في الأمور السياسية، كان الخلاف خلافًا الفكري، بينهم خلاف سياسي ولم يكن خلاف مذهبي.

ن.ر. [00:47:30]: **كنتوا يعني منفتحين على هيدا التنوع.**

د.ع. [00:47:32]: كانت أيضًا، أيضًا، لأنه كان لا يمكن أن تتفتح إن لم تعرف الآخر، يعني هيدي معرفة الآخر وضرورتها، هي الحرب الأهلية هي التي أبعدت، هي التي أبعدت الناس. طبعًا ليس هنالك من مجال للحديث عنها، لكن هي التي أبعدت الناس عن بعضهم. لكن حين كان، ونحن في ثانوية الصباح، فيما بعد، حين كان يطال القصف-- أذكر أن الشباب الذين انخرطوا في المقاومة في البداية كانوا من مختلف المذاهب. ويقاومون إسرائيل. يعني الموقف من إسرائيل، الموقف من فلسطين لم يكن خاصًا، كان خاص بكل لبنان، أو لأقل يعني بكل أهل الجنوب، ولم يكن خاصًا بفئة معينة. هنالك من لعب بالمشاعر والعواطف لأهداف تخدم إسرائيل.

ن.ر. [00:48:35]: **يعني إلتحقتي بشي حزب سياسي، بتتذكري؟**

د.ع. - [00:48:37]: قرأت عن كل الأحزاب. أنا ما فيتي حين أسمع، يعني حين يُطلب إليّ مثلاً أن، من إليّ قلته لك إنه حين دخلنا دار المعلمين كان هنالك دعاة لمختلف الأحزاب. يعني دعونا مثلاً إنه دعوني، دعوني مرة لحضور نقاش حول الحزب، للحزب الشيوعي. اشتريت كتب ماركس وقرأتها يعني بعد ذلك إنه لأفهم. أنا لا يعجبني هذا الحديث. يجب أن أفهم عما يتحدثون. قال ماركس قال ماركس، أحضرت ماركس. اشتريت ماركس، أحضرت للحزب القومي السوري، وقرأت أيضًا قرأت "الإسلام برسالتيه" لأنطون سعادة. قرأت، كنت مع أي جهة ثورية. يعني أنا بطبيعتي الفكرية، مش الشخصية، مش على المستوى الشخصي، كنت مع-- أطلب بالعدالة، منذ أن كنت طفلة. قلت لك، لم تكن فقراء، ولكن مع ذلك كنت أقرأ، ويصيني القرف من ممارسات الأغنياء. يعني دائمًا كان في ذهني، إنه ما جاع فقير إلا بما مُتّع به غني. فدائمًا أتخيل في ذهني، دائمًا أن هؤلاء الأغنياء إما إقطاعيين، شو يعني إقطاعي، يعني إقطاعي يعني من دم الشعب كان العثمانيون يعطون البيك أو، يعطون شخصًا معينًا الأراضي ومن عليها من الناس. فأيضًا هذا نوع من الاستغلال، أي نوع من الاستغلال، أي نوع من التمييز الطبقي، كان يؤذيني، لكن لم أستطع، لم أنخرط، يعني أنا كنت مع ____

ن.ر. [00:50:29]: **كنتي تؤيدي.**

د.ع. [00:50:31]: كنت مع اليسار النظيف بمعنى، أي يسار؟ يعني يسار الإسلام، يسار اليسار. ولست مع التبعية. دائمًا مع استقلالية الرأي. ولإنتي كنت أقرأ ما يتحدثون عنه لم أستطع أن أنخرط إنخرط، لكن دائمًا أنا مع الثورة. كل المظاهرات، كل المظاهرات، حتى مرحلة متأخرة، كل المظاهرات اللي كانت تصير كنت أشرك فيها.

ن.ر. [00:51:08]: **بتتذكري مظاهرة شاركتي فيها هيك شي حدث صار فيها؟**

د.ع. [00:51:12]: المظاهرة إلي في الجامعة. نحنا تظاهرننا في الجامعة سنة ال 1968، كان في مظاهرة وجاء الجيش وقمع. لم أكن في الصفوف الأمامية مباشرة، لكن كنت قريبة تقريباً والغاز المسيل للدموع. كنا في الجامعة. إيه الجامعة كانت في الأونيسكو. حتى الآن كلية الآداب لا تزال في الأونيسكو.

ن.ر. [00:51:37]: بتتذكرني عن شو كانت المظاهرة أو ضد شو؟

د.ع. - [00:51:40]: المظاهرة كانت للمطالبة بأمر مطلبية يعني للبلد.

ن.ر. [00:51:45]: أه أوكيه. طيب إنتي كنتي محجبة طول هالوقت؟ آية سنة—

د.ع. [00:51:50]: أنا تقريباً يعني حتى الخامسة عشرة كنت، وألا كلمة محجبة غلط. الحجاب، لفظ الحجاب غلط استعماله، يعني الحجاب يعني حاجب أو حاجز بينك وبين الآخرين. هو لباس هو ستر هو غطاء الرأس مثلاً. اللباس المحتشم. أما ليس حاجباً يمنع الفكر، لم تكن. حين ذهبنا أنا كنت الأولى بالصف. وهذه القضية، قضية التفوق الدراسي كانت تعطيني أولويات، لأن أليس ما أشاء أن لا أفقد الآخرين. لكن حين أتيت الى دار المعلمين بصيدا، بصيدا كلها من أولها إلى آخرها ما في عجوز أصلاً كانت تلبس على راسها. أنا سألتهم، "أو ما بروح أو ما بلبس"، فكانت ساعة أضع الإيشاراب برقبتي، يعني هوي نوع مش لإته أنا، ولا مرة شعرت إته هيدا مقيد لحريتي الإيشاراب. إيشاراب صغير، إته أن نضعه على الرأس قيد للحرية. لا. كان الأمر بهذا العمر 15-16 السنة نوع من الخجل من الآخرين، لإته النظرة، ما كان في نظرة إته هذا تعصب، نظرة إته هي بنت، بنت القرية أو-- وكان بصيدا الخدم بس الذين بلبسون، اللواتي بلبسن على رؤوسهن الإيشاراب. لم يكن، لكن عندي، لم يكن مرتبطاً خلع الحجاب بالتححرر أو غير التححرر. هذا كان السبب، ولذلك أنا بعد-- صادف إته أنا سافرت قبل الثورة الإسلامية في إيران بسنتين، وعدت وهناك كان يجب أن أقابل علماء دين من أجل أطروحة الدكتوراه عن بهاء الدين العاملي. فوجدت إته— لبست هناك حتى قبل الثورة في إيران كانت النظرة إلى غير المحجبات، هنالك قصة طويلة عريضة وأنت قرأت كتابي عن الموضوع، مسألة الحجاب غير النظرة إليها هنا. حين عدت، وأبي— لأرضي أبي الذي كان محبباً لي، وحتى إته لما خلعت الإيشاراب لم يكن مرتاحاً، لأرضي أبي ولأرضي نفسي بعد الاحتلال الإسرائيلي.

ن.ر. [00:54:25]: خلعتيه فترة يعني؟

د.ع. [00:54:26]: خلعته إيه، من ال 15 تقريباً لل 27-28. عدت أنا ولبسته، لإته وجدت، يعني كنا نذهب مجموعة مثلاً، رفاق، ونحن ندرّس في الثانويّة، شعرت إته ليس خلع الحجاب، لم يعط المرأة-- أنا اشتغلت باكراً مع الجمعيات النسائية، ومع الكلام على حقوق المرأة، والجمعيات النسائية وغير ذلك. لم أجد أنّ خلع الحجاب هوي أعطى المرأة حريتها. لا يمكن أن تتال المرأة حريتها إلا بالتعلم لتفهم ما لها وما عليها. بغير التعلم حتى ولو إذا خرجت عارية ليس تحرراً، وأعرف وحتى حين كنا في الثانويّة عملياً، كان كان معي نساء معنّفات وهنّ شبه عاريات، بهل معنى يعني، ما كان اللباس إطلاقاً خلع ما يسمى بالحجاب لم يعط. حين درست المرأة في الأندلس وأنا في العشرينات يعني بمرحلة الماجستير والتميز بين الحرائر والجواري، بهذا التمييز شعرت إته أيضاً كنت أنظر إلى كلّ النساء اللواتي يتزيّن كثيرًا لذلك أنا بدأت أول بالتعليم اشتريت قلم حمرة وبعد التزيّن. وحين قرأت عن، وتعمقت ودرست الحرائر والجواري، كنت أشعر كنت أنظر إلى كل امرأة متزينة متبرجة إتها جارية. تغير، يعني فهمت وكنت أقول، ويمكن أنا قلتها قبل كلّ العالم، من 45 سنة، إته المرأة في الماضي كانت جارية لرجل واحد، الآن هذه المرأة المتبرجة جارية للجميع.

ن.ر. [00:56:22]: ما بتعتبري هاي النظرة تمييزية، فيها أحكام؟

د.ع. [00:56:25]: لا هي المرأة، ليس-- دائماً التركيز على الشكل الخارجي، يعني هي تعطي، تتحدث عن أتها هي مساوية إنسانياً وتريد المساواة ثم تركز على شكلها الخارجي. معنى ذلك إته هي لا تشعر بهذه المساواة. لو أتها تشعر أتها هي تساوي أكثر ممّا يُنظر إليها، لما اهتمت بشكلها الخارجي لتثير أو لتركّز على جمالها. الجمال جزء، الجمال مطلوب، وهو جزء من شخصية المرأة، لكن أن تركّز على قضية الجمال الخارجي معنى ذلك أتها لا تشعر فعلاً بدخلها بأنّها هي مساوية، بما تطالب به، تستحق أن تطالب به.

ن.ر. [00:57:22]: حلو. بتعتقدي إته الحجاب ممكن يتسيس، أو هو تسييس؟

د.ع. [00:57:24]: أصلاً الحجاب لا علاقة له بالسياسة بالأساس، بالأساس في في فريضة.

ن.ر. [00:57:32]: في بعض ال [غير واضح].

د.ع. [00:57:36]: لا يهمني ذلك، بمعنى إته هو يجب أن يكون، يجب أن يكون اللباس محتشماً، المبالغة المبالغة المبالغة بالتحجب كالمبالغة بالعري.

ن.ر. [00:57:46]: طيب برأيك في فرق بين الحجاب والاحتشام؟ ممكن يكون في فرق؟

د.ع. [00:57:51]: قلت إته هوي تسمية الحجاب غلط. في القرآن عن نساء النبي، إته أن يعطين، أو من وراء حجاب. بس عن نساء النبي، من وراء حجاب، مش ضروري الحجاب يكون الوجه، ممكن من وراء الباب. نساء النبي لسن كغيركن من النساء، ما إلهما علاقة. في—ليست، الحجاب بالنسبة إلى الإسلام ليس فريضة يعني كالصلاة والصوم وغيرها. هو توصية، وصية، توصية. ويمكن يُعطي هوية، ويُعطي. أنا شخصياً تحررت من أمور كثيرة حين عدت، ولبست هل إيشاراب. ارتحت من الكوافير [Coiffeur] مثلاً، مثلاً، لنفترض إته من التزيين. وأنا عملياً كنت، إته قليلاً ما اهتمت بـ-- أنا-- لم أكن أشعر

في يوم من الأيام إتّي بحاجة لأن أتزين كالأخرين. دائماً كان عندي شعور بالتفوق، ولما تولّيت إدارة الثانوية، وكان في بالثانوية، في سنة من السنوات، كان في مئة أستاذ، 60 رجلاً منهم. كنت أجد إنّه يمكن 10 أو 15 أو 20 رجلاً بينهم، يعني رجل بمعنى إنه من يتحمّل المسؤولية. لم أشعر في حياتي أنّ هنالك إطلاقاً يعني بمعنى إنّه أنّي أقل، دائماً أنا كنت أشعر بأنّني متفوقة على الرجال، وهذا الأمر رافقتي _____

ن.ر. [00:59:25]: أعطاي ثقة.

د.ع. [00:59:31]: دائماً قلت دائماً المرأة إذا أردت، الإنسان إذا أراد شيئاً، هوي الله نفسه، إنّ الله ما يغيّر بقوم حتّى يغيروا ما بأنفسهم. والنساء. الآن لنتحدث عن العلم، قلت أنّ العلم هوّ الذي يرفع المرأة من حضيض البهيمية إلى مستوى الانسانية، من دون علم كانت عارية أو محجبة هي أقرب إلى المرحلة الغريزية من مختلف النواحي. إذا العلم هو الذي يرفع الانسان. بعد أن استلمت إدارة الثانوية، أوقفت نشاطي في مختلف الجمعيات التي كنت أشارك فيها. لماذا؟ قلت هذه جمعية خاصة. أدركت حينئذ، والعلم متاح. العلم مجاني، الثانوية متميزة وبناتها من الأوائل كانوا بلبنان في الامتحانات الرسمية لكن ضلّت نسبة المتفوقات كما كانت نسبة المتفوقات في عصري. الآن هنالك شهادات كثيرة ولكن العلم قليل والثقافة قليلة. يعني حين أتّيح للفتيات أن يتعلّمن، هنّ اللواتي رفضن التعلم، بمعنى إنّه هنّ لا يطالغن لا يدرسن كما يجب. أنا درّست في الجامعة، وأعرف عدد الطلاب الذين يعودون إلى مصادر ومراجع قليل، والكثيرون يطلبون محاضرات سطحية ليحفظوها ويدرسوها. يعني هذا-- والجمعيات النسائية التي عملت فيها، أدركت مبكراً إنّه في قسم من النساء اللواتي يعملن في الجمعيات النسائية، يعملن في الوقت الضائع. عندهم وقت فراغ. وإحدى الجمعيات أنا تركتها مثلاً، لإنّه واجهت إنّه، كان في عدد من المعلّمت فيها ما حدا يحثهن على أن يتعلّمن في المدارس التي يتعلّمن فيها كما يجب. كان يومها في نقاش بيني وبينهن. يتبارين من سنذهب منهنّ لتدريس الأميات بعد الدوام. وهنّ أنفسهن كنت أسمع حديثهن، إنّه يتهرّبن من التدريس في المدارس التي يتعلّمن فيها. فقلت قبل أن أغادر، قلت لهم، إنّه نصفكم معلّمت ويتهرّبن من التدريس في المدرسة، علّمو هذا الجيل بدلاً من هذا التصوير، تصوريكم وأنتم تدرّسون الأميين. تدريس الأميين، وهم يدرّسون في المرحلة، في مدارس ابتدائية ولا يدرّسن كما يجب التلاميذ. إذن ساهموا. المسألة ليست مسألة رجل أو امرأة. لو أنّ المرأة، قلت المرأة تتعلم وتصبح إنساناً. أذكر أنّ أحد الأباء أتاني في أحد الأيام ودموعه في عينيه. ابنته الأولى في صف الماتيلام عنّا في الثانوية. حين كنت مديرة، جاءها عريس، أو هي كانت، وتريد أن تترك المدرسة في شهر آذار. جاء والدموع في عينيه، "رجاءً اقنعوها اقنعوا ابنتي أن تبقى حتّى نهاية العام الدراسي". فإدّا هذا دليل، في حين أنّ البنات في الماضي كنّ يتعلّمن، والآن حتّى الآن أقول بالعلم والثقافة تعرف الفتاة ما لها وما عليها.

ن.ر. [01:02:57]: كيف اتعرفتي على زوجك وكم عمرك كان لما تزوّجتني؟

د.ع. [01:03:01]: تقريباً كنت بال كنت أدرّس في الثانوية، وكان في مهرجانات في نادي شقيف، نادي شقيف في النبطية، كان يقيمون أقاموا مهرجان في الصيف، مهرجان فنّي وأدبي يومي. فهنالك إتقينا هوّ كان مهندس راجع من ألمانيا، ومجموعة نحن دائماً كُنّا يعني أصدقائنا شباب وبنات. وتعارفنا هكذا كان التعارف طبعاً مش، تعارفنا بالنادي الشقيف وبعدين خطبنا، وبعد ذلك تزوّجنا.

ن.ر. [01:03:38]: يعني كنتي إنّه عم تشتغلي وهيكم لما تزوّجتني؟

د.ع. [01:03:41]: كنت معلّمة ثانوية.

ن.ر. [01:03:44]: سافرتي برّا لبنان؟

د.ع. [01:03:46]: سافرت، أول مرّة سافرت، سافرت _____

ن.ر. [01:03:49]: لحالك؟

د.ع. [01:03:50]: لأ، سافرت أنا وزوجي. هو أتاه عمل في، هو كان يعمل في شركة ألمانية فطلبوا إليه بأنشاء الحرب الأهلية في ال 75-76، طلبوا إليه أن يختار بلد من خمس بلدان، فأنا لإنّه كنت تعلمت، ومن بين هذه البلدان، إيران، أنا لإنّه كنت تعلمت اللغة الفارسية في المرحلة في الجامعة فقلت له إيران، وهنالك حاولت أن أتابع دراستي.

ن.ر. [01:04:22]: بتتذكّري أول مرّة طلعتي فيها بالطيارة؟

د.ع. [01:04:25]: لا أهتم كثيراً، حتّى الآن أنا أسافر، الناس بيخافوا، كأنه أسافر بالسيارة يعني.

ن.ر. [01:04:31]: يعني كان عادي عندك.

د.ع. [01:04:32]: لأ، أول مرّة حتّى سافرت يعني لم أخف لم أهتم ولا مرّة أنا فكّرت إذا ممكن الموت يعني يكون مفاجئ.

ن.ر. [01:04:43]: بتتذكّري ذكرياتك مثلاً عن البلاد التي كنتي فيها، عن إيران بوقتها؟

د.ع. [01:04:37]: إيه طبعاً. أنا عشت كل الأحداث لقبل الثورة في إيران.

ن.ر. [01:04:51]: مشاهداتك هونيك؟

د.ع. [01:04:53]: كلّه طبعاً، حتماً أولاً، طبعاً أنا حينما تعلمت اللغة الفارسية في الجامعة اللبنانية ساعتين أسبوعياً في السنة الثانية أو الثالثة وأتقنت القواعد ونسيت الأمر. لكن حين قررنا أن نذهب إلى إيران بال 66، بال 76، كانت المدارس مغلقة يعني هنا، وكان في قصف. أنا أخذت إجازة من دون راتب وذهبتنا، قررت يعني في المرحلة التي كُنّا ننحضر فيها

للسفر الى إيران أن أراجع دروس اللغة التي أخذتها لأذهب وأنا مباشرة وأسجل، ظننت إنه الأمر سهل. ذهبت تأخر ذهابنا حتى شهر آذار. طبعاً ما في تسجيل، لكن كان فيه في المنزل تلفزيون تعليمي، على التلفزيون يقدمون الدروس. كنت أحضر هذه الدروس، وكان معي طفلة عمرها سنة ونصف. كنت أحضر هذه الدروس، كلها من الصباح حتى بعد الظهر، لنخرج، حين يعود زوجي من العمل، ونخرج. كنت أحضر هذه الدروس، هذه الدروس كانت مهمة جداً، يعني كانت الغاية في البداية تعلم اللغة الفارسية. لكن من خلال الدروس لحضرتها عرفت أنا التيارات المختلفة، التيار القومي المتعصب المعادي للعرب والإسلام بزمان الشاه، ورضا شاه. عرفت من هذه البرامج من دروس التاريخ التي تُقدّم، في المرحلة الابتدائية والمتوسطة. الأهم من ذلك إنه وجدت فوجنت، يعني أنا التقيت في أول شهرين، بقينا في الفندق. في الفندق يوماً يذهب زوجي إلى الشركة العمل وأنا أجزّ ابنتي وأنزل إلى الحديقة العامة. في الحديقة العامة أتحدّث مع الناس، لأنه لأمرّن لساني. فقال لي كبير في السنّ، لم أكن ألبس الإيشارب وقتها. قال لي رجل شيخ، قال إنه أنت لا تحادثي أنت امرأة متروجة، لا تحادثي إلا الكبار في السنّ. شرح لي، يعني لم أفهم كثيراً مقصده، فيما بعد فهمته. إنه في ذلك الحين كانت النظرة إلى غير اللواتي لا يلبسن إنه نظرة سيئة جداً. لأنه يختلف عن خلع الحجاب، هذه القضية كثير مهمة جداً كانت بالنسبة إليّ، إنه فهمت، أن تفهم حضارة أخرى وتفكير آخر وشعب آخر. النظرة إلى الحجاب، إما متديّنة أو غير متديّنة، يعني تنتمي إلى عائلة دينية أو إلى عائلة غير مسلمة. غير مسلمة ليس بمعنى الهوية، ولكن التيار القومي كان معادياً للإسلام. يعني هذا الإسلام الذي أتى به العرب إلى إيران، هذا التيار القومي نشأ في زمن رضا شاه وتعزز في زمن ابنه الشاه. عرفت كل الأمور السياسية، مقدمة الأمور السياسية وأنا هناك. جاءت صبية لأعلمها، نتبادل يعني هي، أقرأ أمامها أنا نصوص باللغة الفارسية، وهي تتعلم اللغة الفرنسية ف ونتحدّث. فأنتني بنصّ، أول نص قرأته هو نص لشاعر اسمه، [Khosrow Golsorkhi]. هذا من في المرحلة سنة 2000 لما كنت أكتب في السفير الثقافي عن الأدب الفارسي الحديث. وضعت له، كان هو من أول الشعراء الذين كتبت عنهم. هذه القصيدة لم أفهم، فقط هي أنت ما كانوا يتحدّثون بالسياسة، وكانوا يخافون. يعني هؤلاء كانوا عائلة ثورية، ولكنهم كانت صورة الشاه نصف الحائط في منزلهم. كان هنالك يعني هيدا السراب وفيما بعد فهمت كل هذه الأمور السياسية. لكن حتى الآن لا يمكن أن أنسى هذا النص، هذا الشاب الشاعر، [Khosrow Golsorkhi] كان شيوياً كان عمره 22 سنة لما أعدمه سنة 1972. وهو على منصة الإعدام قال، قالوا له عندك آخر وصية قال قال شيء نص طويل عريض مكتوب يعني هيدا قلت نزلته وقتها في السفير، يقول فيه إنه أنا ماركسي لينيني، ولكنني أنا أريد، يعني أنا ضد الظلم والطغيان والديكتاتورية، وكل هذه الأمور. أنا أريد إسلاماً غير هذا الإسلام، أنا أريد إسلاماً هو إسلام عليّ بن أبي طالب، وأريد إسلاماً هو إسلام الحسين ابن عليّ، الأول نائر في الشرق الأوسط، أستخدم عبارة الشرق الأوسط، في الشرق الأوسط، هذا [Khosrow Golsorkhi]. عرفت كما قلت من خلال التلفزيون وليس من خلال الشابة التي أتتني بالقصيدة. حتى إنه لم تقل لي إنه هذا الشاعر قد أعدم. أنا فيما عرفت حينما بدأت أقرأ الأدب الفارسي وجدت قصته. لكن تنكرت هي كان أول نص أنا قرأته. أهمية أن تعيش، هوي صحيح أنا لم أبقى هناك أكثر من، أقل من سنتين، لأنه قامت الثورة، وعدنا. لكن كلها كانت دائمة يعني مراقبة. أنا لدي حسن المراقبة والنقد باكراً. غيرت الكثير المفاهيم. عشت، عشت أحداث الثورة كلها، أنا كنت من على سطح منزلي رأيت الطائرة الهليكوبتر [helicopter] وهي تقصف المتظاهرين. من المنزل الذي كنا نعيش فيه. رأيت يعني أول مرة في حياتي، درسنا كثيراً وقرأنا عن الثورات والمجازر التي كانت تقوم والفريقين أما ثورة، يعني ما جعلني أهتم بها، إنه ثورة الناس، ليس في أيديهم أسلحة أو غير ذلك، يسيرون والدبابات تسير عليهم. تواجههم. أو إنه تأتي الطائرة الهليكوبتر ويقودها إسرائيلي مثلاً، أو متدرب على يد الإسرائيليين. الأمر الأهم من هيك، هوي بلي غير، طبعاً تعلم لغة ثانية، نحن نجيد الفرنسية، ودرسنا الأدب الفرنسي، أما أن تجيد أيضاً لغة ثالثة وتدرس أدبها وتدرس حضارتها هذا أمر مهم جداً يعني الثقافة. الشيء الذي أذكره ولا يمكن أن أنساه، بالنسبة إلى إيران، إنه أول امرأة في الحديقة العامة تحدّثت إليها، كانت إسرائيلية. أنا ذاهبة والقصف الإسرائيلي على النبطية على قدم وساق، يعني ذهبتنا بالعام 76 والقصف الإسرائيلي ونحن ربينا منذ أن ولدت أنا معرّضة المنطقة منذ احتلال فلسطين. أول امرأة كنت أخاطب ابنتي، يعني أقول، قلت لابنتي تعالي، دائماً كنت أخاطبها بالعبرة عربي وفرنسي. [viens ici] امرأة قالت، [tu parles francais?] قلت لها هيك وأنا مبسوطة [oui, je suis libanaise]، فردت هي وقالت [je suis israelienne]. أنا أول شغلة عملتها، حملت، ما تخيلت، صدمت إلى درجة إنه أنا حملت بنتي ومشيت. هوي لا قالت [je suis israelienne]، أول شي قتلها [je suis libanaise] وين بيشتغل زوجي. فقالت [je suis israelienne] وإنه زوجها بيشتغل بالسفارة الإسرائيلية. يعني أول مرة بسمع، إنه كنت اعرف قبل ان اذهب، إنه إسرائيل عميل لأميركا، والشاه عميل لأميركا والشاه هوي يعني سياسيات كنت أعرف هذه الأمور، لكن لم أكن أتوقع أن أرى امرأة----

ن.ر. [01:13:21]: قلتيلي صدمتي إنها هوي إسرائيلية.

د.ع. [01:13:23]: يعني لم أكن اتخيل إنه أول امرأة أول شخص ممكن أن أخاطبه بيكون تكون إسرائيلية وتفاجأت إنه يكون في سفارة إسرائيلية بالمدينة.

ن.ر. [01:13:38]: يعني انتي عشتي زمن الحرب؟ لما فانت إسرائيل على لبنان أو كنتي وقتها مسافرة؟

د.ع. [01:13:45]: لأ، عشتها كلها، أنا كل اللي غبتهم سنتين. وأقل من سنتين، كنت آتي منشان المدرسة. أقل من سنتين. طبعاً ما عشت الحرب الأهلية ببيروت، بس أنا عشت بالجنوب، القصف الاسرائيلي مستمر. ولذلك أنا بقول، يعني اللي ما عاش، الذين ما كانوا يعيشون في جنوب لبنان لا يعرفون أهمية المقاومة وأهمية التحرير وهذا أمر مفروغ منه. نحن نشعر حتى الآن، إنه أنا منذ أن وُلدنا وبعدين بدأت إسرائيل، دائماً في-- أتذكر إنه كنا صغار، كنا بأول، لا أدري بأي سنة وذهبتنا رحلة الى الجنوب. أرجونا هيدا البيت بضعة اسمها عيترون، عيترون هي القرية التي مديرة الثانوية الآن منها. هذه السيدة مثلاً مديرة الثانوية الجديدة، السيدة زينب عباس مثلاً، من عيترون، هي لم تكن تذهب الى قريتها، لإنها هي خلقانة سنة 67، سنة 67 أصلاً لا تستطيع الذهاب الى قريتها لأن عيترون معرضة، هذه القرية كانت دائماً معرضة للاعتداءات الإسرائيلية. فأهمية، طبعاً، وحتماً كما قلت الدولة، لم تكن، لم يكن في شعور، إنه هنالك دولة مسؤولة عنها، يعني دولة المسؤولة، أنا ما شعرت بإنه الدولة مسؤولة. بأي معنى، بمعنى إنه طالما، بالمدرسة ولا بغير المدرسة، لا بالمدرسة ولا بالدفاع عن أهل الجنوب. ولو يحتلوا، احتلت إسرائيل كل الجنوب، وما حدا دافع عنه إلا أهله.

ن.ر. [01:15:34]: بتتذكر شي يوم من أيام القصف الاسرائيلي، هيك بعده مركز براسك؟

د.ع. [01:15:39]: عطلت بتذكر القصف.

ن.ر. [01:15:43]: أكثر شي هيك، بتتذكر شي--؟

د.ع. [01:15:46]: بتذكر مثلاً لما كنت، أه إذا كنت ماشية مشي، وبدي القصف ممكن إتخبني بأي محل. بس لما كون عمّا قود السيارة مثلاً، بخاف ما يعرف السبب. يعني مرّة بدأ القصف، وكنت بثانوية الصباح، كنت عم علم بثانوية الصباح. وقررت أن أهرب بالسيارة، ففتنت بالحيط. يعني عملت حادث. فأكثر من مرّة يبدأ القصف إنه ممكن أن أختبني، ولذلك لما لاقوا على سيارتي بالناعمة بالـ 2007— لما قطعوا طريق الناعمة باتجاه الجنوب، وصاروا يضربوا السيارات، كتبت نصّ نزل بالسفير، إنه ليس خوفاً إمّا رعب. قلت إنه السيارة ليست سقفاً يحميك، يمكن هذا وقتها إنه السيارة. السقف، الشعور وقتها إنه بالقصف الاسرائيلي، إنه في سقف أو سقفين ممكن أن يحمي. ما كانت بعد الأسلحة اللي استخدمتها إسرائيل مدمرة الى درجة اللي استخدمتها بالـ 2006. كان يصيب حائط مثلاً، ما كان يتهدم المنزل كله. ودائماً كنت أقول لا أحد يموت قبل أن ينتهي عمره يعني. وكان يقولون إنه دلال في المبنى يقولون تخاف من صورة الحية ولكنّها لا تخاف من صوت القذيفة مثلاً. هيدي مسألة قضية الخوف أو الرعب مرتبطة بحالات نفسية معينة، يمكن لإنه لم أرى مباشرة أحد قد قُتل. ولكن في مرّة صار في قصف مثلاً على حيّ سكن بيت أهلي، وأصيبت رجل أختي الصغيرة، هيتي معلّمة الفلسفة. وشظية في رجلها وشظية في إصبعها. بيت أهلي أكثر من مرّة أصيب في القصف، وما كان في أرواح.

ن.ر. [01:18:07]: بقيتوا بالنبطية وقت اللي كانت إسرائيل هون؟

د.ع. [01:18:12]: وقت الاجتياح ذهبنا تقريباً حوالي شهر الى ضيقتنا كوثرية السياد. كان زوجي مسافر، وأهلي هناك. فذهبت مع الأولاد ورجعت. بس بوجود الاسرائيليين كانوا موجودين. وأذكر إنه حين دخل الاسرائيليون قبل أن نذهب أنني بكيت، حين رأيت امرأة عجوز ترشّ عليهم الأرز في النبطية الفوقا، على الطريق العام، بكيت.

ن.ر. [01:18:47]: ترشّ على مين؟

د.ع. [01:18:48]: على الاسرائيليين.

ن.ر. [01:18:49]: ليه؟

د.ع. [01:18:50]: لما دخلوا عرفتي فكروا إنه الآن بيرتاحوا من القصف. امرأة أمية.

ن.ر. [01:18:56]: كان وقت في الفدائية و هيك أشياء.

د.ع. [01:18:58]: كانوا يظنون إنه لولا وجود الفلسطينيين أو المقاومة الفلسطينية ما كانت إسرائيل بتضرب. يعني طبعاً هذه المرأة لم تكن تعرف إنه إسرائيل وجدت لتحتل المنطقة كلها إذا أتيج لها الأمر. هذا من دون الدخول في التفاصيل. حتماً أنا كنت كنت أدرك إنه في اخطاء للمقاومة الفلسطينية، أخطاء مميّنة. لكن بالوقت نفسه، ما قلل إطلاقاً ولا لحظة عندي من العداء لإسرائيل. أبداً يعني مهما كان المسوّغ والمبرر. أنا أي إنسان، أنا حتى الآن إذا سمعت على التلفاز أو في أي مكان شخص يقول إسرائيل يعني ولا يقول فلسطين المحتلة أكرهه. عندي الآن الكرة الارضية في رأيي منقسمة الى قسمين إسرائيل ومن معها. هذا القسم. ومن يعادي إسرائيل في القسم الاخر، هذا أمر مفروغ منه.

ن.ر. [01:20:09]: يعني بعدين صار في هيدا الإدراك عن أهمية المقاومة، واسرائيل عدو، أول شي استقبلوهم، عطيتي مثل عن المرأة.

د.ع. [01:20:16]: لا لا، أنا عطيت مثل عن امرأة، امرأة أمية بسيطة كانت تسمع أو يقولون قدامها إنه لو هي إسرائيل، ما كان في تلفزيون إلا التلفزيون الاسرائيلي كان يبجي. إنه يقولوا لولا المخربين لكننا قصفنا. طبعاً هي لا تعرف، لم تسمع لا باسم بلفور ولا وعد بلفور، ولا تعرف إنه إسرائيل من الفرات الى النيل. يعني هذا ليس مقياساً أو معياراً إذا كان في نساء أو رجال كبار في السن أو لا يعرفون، يعرفون الأمور بشكلها السطحي.

ن.ر. [01:20:53]: مهمم مضبوط. طيب بدي أرجع لقصة إنه لما فتّي مجال التعليم، علمتي بثانوية الصباح؟

د.ع. [01:20:59]: أنا علّمت في البداية كما قلت، في المدرسة النموذجية، علّمت سنة قبل المدرسة النموذجية، في المدرسة يلي اسمها مدرسة ليلى نصار. علّمت سنة ثم فُتح دار المعلمين في النبطية وكان في مدرسة نموذجية تابعة للدار، نعطي دروس نموذجية أمام طلاب الدار

ن.ر. [01:20:21]: يعني أول شي فتّي على دار المعلمين بصيدا، ورجعتي--

د.ع. [01:21:23]: دار المعلمين الابتدائية بصيدا، أخذت مع دار المعلمين درست بكالوريا وفلسفة. وبعد ذلك دخلت، بدأت إنّ التعليم. وأنا أدرّس في المرحلة الابتدائية، درست الإجازة، الليسانس في بيروت كنت أذهب الظهر الى بيروت وأعود ليلاً. وحين أنهيت، عملنا مباراة-- ببصير في بعد الليسانس، مباراة للتعليم الثانوي. وكنت وقتها السادسة في لبنان، بالمباراة وعُيّن في ثانوية الصبا، علّمت بثانوية الصبا كما ذكرت لك، وكانت هذه المرحلة غنية جداً.

ن.ر. [01:22:07]: كيف كيف صرتي مديرة لثانوية البنات؟

د.ع. [01:22:09]: هو الحقيقة سنة 84 قالوا إنّه بدهم يفتحوا ثانوية بنات. كان في 3 معلّمت من النبطية بالتعليم الثانوي، واحدة، ما بدها. يعني سيّدة لا تريد أن تكون مديرة. واحدة كبيرة في السن، لم تكن كبيرة جداً، ولكن كان ملفها قال كله تقارير طيبة، وتغيب كثيراً. وواحدة جديدة على التعليم الثانوي، كبيرة في السن، لكن جديدة كانت على التعليم الثانوي. انا كنت في 35 تقريباً من عمري وعرضوا عليّ أن أكون مديرة، ما كنت. أنا حين عدت من إيران لم أستطع أن أكمل الدكتوراه هناك، وكنت أحضّر تقريباً بتمهل، يعني سجلت باليسوعية، وطال الوقت، وكان في قصف إسرائيلي، وشبه احتلال يعني محتلة كلّ المناطق القريبة منا. فشعرت وقتها قبلت بالإدارة، مع إنّه هيدا لم يكن توجّهي، توجّهي كان القراءة ومتابعة الدراسة. قبلت بالإدارة، كإنّه هي جمعية، كإنّي فتحت جمعية خاصة، من ناحية. وكأنّه ممكن أن أؤدّي دوراً من الصمود في مرحلة، ممكن أن أؤدّي دور. لا أريد أن أعطيه يعني كلمات أكبر، صمود أو غيرها. ممكن أن أؤدّي دوراً في هذه المرحلة، بمرحلة الإحتلال. وهذا اللي صار بال 84-85 فقبلت الإدارة. سنتها فتحتوا بالجامعة اللبنانية، مرحلة الدكتوراه. بعد أن استلمت بأشهر، فتحتوا. أنا كنت قد حضّرت، كانت أطروحة الدكتوراه التي كنت أعدها، أحضّر لها في إيران وعدت من دون إكمالها. عن بهاء الدين العاملي، أديباً وفقهياً وعالمًا. ف-- وكنت أحضّرها، حضّرتها لتكون كتاباً، لكن حين بالعام 85 عدت سجّلت الدكتوراه في الجامعة اللبنانية مع الدكتور رواساني لأنّه كان يعرف الفارسية، لأنّه هي نوع من الأدب المقارن، عربي فارسي. هو كان يعرف الفارسية وسجّلت أطروحة الدكتوراه. كانت تقريباً شبه مُنجزّة، وكان يجب أن أنتظر سنتين ونصف أو ثلاث سنوات لكي أناقش، لأناقش، هذا الذي جرى. بالنسبة إلى الإدارة، لم أكن أتهم أو يُقال إنّه أنا كنت، إنّي متسلّطة، أو، الأمر ليس كذلك. أنا لأنّه انخرطت، كما قلت إنّه النساء والجمعيات النسائية والمطالبة بالحقوق-- فكنت يعني دائماً أنظر، أريد من الفتيات، دائماً أدخل الى الصفوف في المرحلة الأولى. كنت يومياً أدخل ساعة الى كلّ صف، وأتحدّث عن أهمية العلم، وكل هذه. كما قلت إنّه تعاملت معهم كأنهم جمعية وأنا أتعامل معهم. ولذلك كنت أي نوع يقولون إنّي متشددة، متشددة بأي معنى. يعني الفتاة التي تأتي بالكعب العالي أو تلبس كذلك، أقول إنّه إذا أرادت أن تتعلّم فيجب أن تتعلّم. وكنت أتحدّث عن الحرائر والجواري أمامهم. كنت أتحدّث، كنت أركّز مثلاً أحياناً مرّة تحكي لي صبية الان معلّمة وهي بدأت تعلم في الجامعة، إنّه كانت هي طالبة في الصف الماتيلام، أعطاني الاستاذ الرياضات المسابقات لأورّع المسابقات عليهم، وإنّه كُنّا 11 تلميذة، والـ 11 علامتهن متفوّقات. فأخذت المسابقات وصعدت إلى الصف، فوجدت في الصف كلينكس [Kleenex] وبعض الأوساخ فرميت المسابقات أرضاً. وقلت لهنّ إذا صارت الوحدة منكن طيبة أو مهندسة أو عالمة ذرة وهي ما بتعرف إنّه ما لازم ترمي وسخ على الأرض معناتها كإنّها لم تفعل شيئاً، ما في إلا الحيوانات بزّتوا على الأرض. هيدي أنا كنت ناسية الحدث لكن هي ذكرتني بهذا الموضوع، وهيّ قالت لي، إنّه هي تهتم بنظافة المحيط حيث تسكن، لأن هذا الأمر بقي في ذهنها. كنت أركّز أكثر، الدرس. المتفوّقة متفوّقة. إن كانت بمدرسة أو خارج المدرسة، ممكن أن تدرس لوحدها ببيتها إذا عندها ميل. لكن بالنسبة للأكثرية، يعني كنت أرسل إذا عرفت إنّه فتاة خُطبت باكراً، وهي لا تزال قبل المرحلة الثانوية، أرسل وراء الأهل وأحدثهن لأوّل 5-6 سنوات. بعد ذلك مللت. يعني بالمرحلة الأولى كنت أهتم أنا شخصياً بكلّ هذه الأمور، بعد ذلك وجدت إنّه نوع من مضيعة الوقت، خاصة بالنسبة للأمهات. أنا أتنتي مرّة، أعطي مثل. مرّة سمعت الناظرة تناقش امرأة. ناظرة، سمعت صوت الناظرة وهي سيدة تتحدّث تقول لها إنّه أجلي، تقول لها إنّه أجلي الزوج. جاءت السيدة لتأخذ لابنتها إفادة من في منتصف العام الدراسي، قالت لها إنّه "ماذا الآن الإفادة المدرسية؟". لا أتت لتأخذ ابنتها، قالت لها إنّه "هي خطبت، في عريس على أميركا". قالت لها إنّه "خلي هالبنات في المدرسة لنهاية العام الدراسي، هيّ هلق بدها تسافر؟". قالتها "لا مش هلق، بس بأخر السنة". قالتها "لتنهي صفّ الـ"، هيّ كانت بصفّ الفلسفة. آخر صفّ بالثانوي. وعم يتناقشوا، قمت أنا وقفت عم بسمع الحديث. فقالتها، "الأ هوّ العريس قلها هلق بدها تجي؟". قالتها "لأ أهله للعريس". قالتها أنا "شارطون، قولولهن إنّه لتنهي العام الدراسي، فهلق بتسافر على أميركا ومعها شهادة ثانوية. إذا استطاعت هناك بتتابع دراستها وإذا ما استطاعت يمكن في أحداث كثيرة أصبحت إنّه يمكن تضطرّ فيما بعد أن تتابع دراستها، أو تعمل أو شي إنّه بحاجة إلها". فقالت "بدنا نشارطهم كيف بدنا نشارطهم منشان هل شو الشرط السخيف، منشان هل، منشان هل الموضوع السخيف؟". فقالتها بما إنّه، قللتها للناظرة، ما التفتت على المرأة، بس قلت للناظرة، "طالما إنّه هذا الشرط بنظرها، متابعة السنة الدراسية، شرط سخيف، فلا تروح هيّ وبنتها". فهذا نموذج، هذه امرأة امرأة كانت آتية، يعني نصف ثياب لابسة على

المدرسة، بمعنى هذه السيدة التي بدها، السيدة صبية، هي السيدة ممكن تكون تلميذة كانت بالثانوية. الأم، هذه الأم التي هي شبه عارية كانت اتية الى المدرسة، وبنيتها اعتبرت إنه عبدة، إنه إذا طلبت من أهل العريس إنه تبقى البنت لأخر العام الدراسي هذا شرط سخيف. فهذا نموذج أقول لك فقط، أعيد القول، إنه بس العلم بحرر المرأة. العلم بالمعنى الحقيقي ولا أقصد بالعلم، إنه كمان بس يؤدي الى العمل المادي. لأ العلم، تعرف على الأقل، الحقوق.

ن.ر. [01:30:18]: شو هي الأشياء التي ما كانت تعجبك فيها لما جيتي على الثانوية؟ الأشياء لما ما كانت تعجبك او إنتي ساهمتي بالتغيير فيها، من خلال الإدارة أو السلوكيات العامة، القوانين العامة؟

د.ع. [01:30:31]: لا أعني إنتي غيرت كثيرًا أو بالقوانين، طبعًا ناضلت. ما في مرة جينا استاذ، ما في اي شيء من دون مطالية. يعني ما كان بسهولة كل الامور تأتي. فضلًا عن إنه يعني الارتباط والنواب والقوى السياسيّة الموجودة دائمًا بتحارب بشكل غير مباشر، لأنه دائمًا بتطلب طلبات غير قانونية وغير أخلاقية وإنتي ما بتلبي. أنا ومديرة في الثانوية بسبب إدارة الثانوية، أنا ما تفرغت بالجامعة وأنا كنت برتبة بروفيوسور 15 سنة. ضليت أنا 19 سنة لتفرغت بقول إنه 20 لأنه عشرين هيدا ال [chiffre rond] أحسن. ما تفرغت بالجامعة لأنه التفرغ ما كان خاضع، ولا، خاضع لـ. ما إله مش خاضع للمستوى الأكاديمي بسبب الثانوية. بسبب الثانوية لأنه القوى التي ممكن هيّ تساعد أو تفرغ أو تعمل هيّ التي كانت تطلب مني إفادات مثلًا لبنت يمكن تكون مجمعة 35، ممكن إذا كان بيها أو تنتمي إلى فئة معينة من الناس. بالتسعينات يعني معروف، كان بدهم إفادات مزورة، النواب التي كانوا ما تنسي إنتي إنه هيّ بكفرمان، كان يُطلب إلبنا، إليّ عمليًا إفادة، علمًا إنه الناس يعرفون يعرفونني ويعرفون أهلي ويعرفون إنه هذه المسألة صعبة. ولكن دائمًا الطالبات كانت مكررة. ما في سنة، عمليًا ما اصطدمت أنا وحدا من السياسيين، حتى مرة انسرفت المدرسة وطلبوا مني إنه غير الشهادة وقول إنه كان الشباك مفتوح لحتى فاتوا الحراميّة، يعني بمعنى.

ن.ر. [01:32:31]: يعني كنتي هيك توقف الأشياء بوجهك؟

د.ع. [01:32:33]: يومها يومها قلّي الناظر العام، قلّي إذا تفرغت إم عباس في الجامعة راح تفرغني، أم عباس هيّ الحاجة التي في الثانوية. فعلتلهم درس ديني لأنه، درس أخلاقي يعني بدلًا. هيّ معروفين، شخصيات معروفة. أنا أتيت من الكتب الى الإدارة، الإدارة-- كنت بمرحلة معينة أقول إنه لولا الإدارة إنه كان زاد عدد الكتب التي ألفتها أو ما زاد. لكن فيما بعد أدركت إنه ما في شيء منعمله بالحياة إلا بيكون له وظيفة، وظيفة يمكن أنا كنت بقيت، دخلت على التعليم الجامعي. يعني حين دخلت الجامعة، دخلت وكان عمري 40. حين بدأت التعليم الجامعي، وتأخرت 20 سنة لحتى تفرغت. لو بهل مرحلة كلها، إنه كنت يمكن ألفت أنا كتب أكثر أو غير ذلك، بس يمكن أكيد هذه التجربة، كنت فقدت هذه التجربة، تجربة معايشة الناس، معايشة عامة الناس، معايشة، معرفة السياسيين عن قرب.

ن.ر. [01:33:46]: بتذكر وقت كنتي بالثانوية ومنعرف إنه دلال عباس جاية مديرة، فكنا هيك نحسب حساب، ألف حساب، إنه إنضباط

د.ع. [01:33:57]: لأنه

ن.ر. [01:33:58]: حتى المعلّات كانوا هيك، برأيك في فرق بين الطالبات هيديك الإيام وهلق؟ يعني إنتي درستي بديتي بال 85 أكيد في تغيير.

د.ع. [01:34:10]: ب 85 بالإدارة.

ن.ر. [00:08:36]: بالإدارة تغييرت تغيير شي [غير واضح] إذا فينا نقول؟

د.ع. [01:34:17]: تغيير المستوى إلى الأدنى، مش الأفضل. أولاً البرامج لأقول لك شيئًا، حين كنت أدرس، أنا كأستاذة لغة عربية وأدابها. البرامج التي درستها أنا بالمرحلة الثانوية بالسبعينات، أصبحت هنا في هذه المكتبة، الكتب التي درسوا فيهن في المرحلة الثانوية مراجع لأنه سهلوا فيما إنتو جيلكن مثلًا سهلوا البرامج. البرامج الآن برامج المرحلة الثانوية مختزلة مختصرة إلى درجة مثيرة أحيانًا مثيرة للاشمئزاز. في المواد الأدبية. كإته هنالك خطة غير مباشرة لإبعاد هذا الجيل عن التراث. هذا من ناحية. ومن ناحية ثانية أيضًا اختصار المناهج الجامعة. يعني أنا مادة مثلًا درستها لنفترض مادة التي كنا ندرسها في الجامعة سنة كاملة، ساعتين أو أربع ساعات أسبوعيًا، أصبحت المادة نفسها بفصل بساعتين أسبوعيًا والفصل بيروح منه شهرين أول وبآخره للإمتحانات. على أساس إنه يمكن الطلاب هم يدرسون ويبحثون على أنفسهم، والطلاب لا يبحثون ولا يدرسون. فإذا المستوى تدنى بدلًا من أن يتطور ليصبح أفضل، المستوى أفضل. حتى الآن أقول بزمانني أنا نجح واحد بالفلسفة بالسنة إنه كلها لما درسنا بالثقافة العامة في السنة التي قبلنا كتبنا لم ينجح أحد. حتى الآن المستوى هو نفسه. لكن زاد عدد حملة الشهادات لأنه سهلوا الشهادات صار عدد حملة الشهادات، لا يستوعب البلد هذه الشهادات كلها والشهادات من قريبه ممكن نسميها بالعامة "من قريبه" لتعدد الجامعات أو لا حتى يعني بالجامعات الرسمية لأنه انخفاض المستوى من الناحية صار أسهل. خدي نموذج مثلًا البريفيه، المدرسة لم ينجح أحد، الآن التي درجته جيد جدًا، مثل التي نجح كان بزمانكن انتو ينجح من دون درجة. والآن الذي ينجح من دون درجة إن كان بالمرحلة الثانوية أو بالمرحلة المتوسطة كأنه لم يدخل المدرسة. هو الراسب، يعني سهلوا الامتحانات فزمو المناهج وسهلوا الامتحانات وبيصير كل الأجيال حاملة شهادات ولذلك لا تعمل، أي لا تقوم بأي عمل. يعني يقول الشاب مثلًا إنه هو يحمل إجازة، هو يحمل إجازة من أي جامعة هيك، أنا أحمل

إجازة ما يعرف إجازة بهيدا الاختصاص أو إجازة بهيدا الاختصاص. إنه ما يشتغل عامل، أو ما يشتغل-- كل اللي حاملين إجازات بدهم يتوظفوا مثلاً لنفترض. إنه بدهم عمل معين. ففي أعمال ما بيشتغلوها، وبضلعن يحكوا إنه العمالة الأجنبية وغير الأجنبية.

ن.ر. [01:37:35]: طيب ما هوي حق التعليم للجميع--

د.ع. [01:37:36]: حق التعليم للجميع، الدولة يجب أن تؤمن مدارس وجامعات ومش مدارس خاصة ويكون إليها مستوى متميز. هيا فاتحة الباب، يعني فاتحين دكاكين مدارس. ودكاكين جامعات. ولإنه هي الدولة من الأول، مش دولة، كما قلت إنه مش أم هيا خالة، زوجة أب، كأنها زوجة أب سيئة وليست أمًا لكل الرعايا.

ن.ر. [01:38:08]: استعنتي بسلمى علي احمد اللي هيا كانت الرئيسة السابقة لجمعية تقدم المرأة وهيا كانت معلمة كمان لحتى تعلم الفتيات الإتيكيت [etiquette] و؟

د.ع. [01:38:20]: أنا سلمى علي أحمد، سلمى علي أحمد كانت هي معلمة في المدرسة المتوسطة اللي درست فيها ولما حين انتقلت الى المدرسة النموذجية التابعة لدار المعلمين انتقلت هي أيضًا. وكانت تقوم بأنشطة لطلاب الدار وللمدرسة، بالمدرسة الابتدائية، لهيا أنشطة فنية واجتماعية، أنشطة. وكانت رئيسة تقدم المرأة اللي كنت أنا عضو فيها. لما كانت كانوا عم يسألوني إنه تركتي الجمعية وعنا إجتماعات، قلناهم، قلناهم إنه أنا صار عندي جمعية، جمعية خاصة. فما رأيك أن أنفلك إلى الثانوية، إنه تأتي مُتدبة إلى الثانوية وساعة لكل صف أسبوعيًا، تعلمهم يعني تحكي عن دور المرأة الاجتماعي، عن يعني، هيدا شي أنا ابتكرته مش موجود بالمنهاج. ضلّت سنتين أو ثلاث سنوات وبعدين طلبوا إنها ترجع. يعني ما وافقوا. بالأول، في البداية، نقلتها، ما بعرف سألوا، سألوني بالتعليم الثانوي شو بنشغلها؟ قلناهم، ما عجبتهم الفكرة، أو ما اهتموا فيها، إنه مش درس. لكن كان دور مهم، إنه كيف يمكن أن تصبح كل الأمور لها علاقة بالعمل الاجتماعي، لها علاقة بدورها هيا كأم، لها علاقة بدورها كمواطنة بالمجتمع شو ممكن يكون دورها. يعني ما كنت أقوله أنا مثلاً عن النظافة أو غيره، فيما بعد تبنته السيدة زينب مقلد، وقامت، بهذا مسؤولية المكتبة. لكن كان دور سلمى علي أحمد، إن كنت فكر، فكرت بأمر كثيرة فيها ابتكار بس ما كان في موافقة مثلاً، من الوزارة. أنا أول ما نقلنا كنت فكرت إنه أعمل غرفة، نوع من الحضانات للمعلمات اللي عندهن أطفال. يعني حضانة. ما وافقوا بالوزارة، ما بوافقوا، يعني لأنه ممنوع، إذا عملنا حضانة هيا المعلمات بدهن بدنا نستأجر سيدة لترعى الأولاد وبدهن يدفعوا مصاري. أي شي إلو دفع، هيا المسألة منيحة، منيحة يعني من أي ناحية، إنه ممنوع جباية قرش مثلاً، أي قرش خارج، ممنوع الجباية. لكن قضية ال-- بس كانت جيدة القصة لو إنه مسموح إحدى العائلات يعني تتولى رعاية الأطفال، لأنه فيما بعد، قبل ما أعرف أنا بالدول المتقدمة في، أنا ابتكرتها هياي القصة سنة الـ 84 وبعدين عرفت إنه والله في أماكن كثيرة بمكان العمل بيكون في حضانة، يعني لما يكون الطفل موجود، ما كان في حضانات كثير بالنبطينة. في أمور، في أمور أنا بالثانوية ايجابية ممكن أتذكرها يعني أذكر إنه يمكن، سجلت لي، أذكر في إحدى السنوات ما كان في امتحانات بريفيه، فما ما في امتحانات بريفيه فتسجل، لا نعرف المستوى، ما في بين أيدينا شهادة، يعني لا نعرف مستوى التلميذات على الإطلاق. فعملت امتحان دخول، هوي ما في امتحان دخول، بس عملت امتحان دخول بالرياضيات والعربي وبالفرنسي. بكل المواد تقريباً لحتى نميز بين اللي وضعهن أحسن، لنميزهم. فسألوني بالتعليم الثانوي، إنه السنة اللي بعدها صار في امتحانات رسمية، كمان أنا وضعت بالصفوف على حسب بحسب العلامات. فسألوني وقتها، إنه لا التلاميذ بيتعلموا مع بعضهم. قلناهم هلق هو صاروا، أنا رأيي، ميّزت مثلاً صفتين متميزين، اللي علاماتهم منيحة. وقتها نجحوا كل العالم بالبريفيه، من وقتها بديت ينجحوا كل العالم يعني. قلناهم إنه لا أنا رأيي الموقف الشي اللي أخذته، كان المفتش متخلف إلى حد ما. وهوي، قلناهم لا أنا القرار يعني التدبير اللي عملته أنا بدافع عنه بمعنى إنه صحيح بيتعلموا من بعضهم، لأ هلق صاروا بالمرحلة الثانوية، ما عاد، هلق عم يتعلموا أدب عربي، ما عاد في وقت نعلمهم قراءة عال حاضر، ولا أدب فرنسي، ما وفي وقت نعلمهم قراءة. ولا رياضيات، نعلمهم كيف بدهن يحسبوا. في بنات معهن بريفيه وما بيعرفوا يجمعوا 2 و 2 مع بعضهم فهو بضيعوا وقت-- الأستاذ بيصير بدو يضيع الوقت على الضعاف، وبدو يضيع من وقت المتفوقات. فإذا نحنا، وضلّيت على رأيي، وما رديت. حتى إنه يعني كان في خلاف بيني وبين التفنّيش حول هياي الأمور. أمور جزئية، يعني أنا أراها إنه هاي مش موجودة بالنص. بس لما كان الأستاذ محمّد الحاج، هوي مدير التعليم الثانوي، وكان معجب بأرائي كنت أعمل اللي بدي إياه. كان بالتعليم الثانوي، المسؤول القانوني بالتعليم الثانوي اسمه الأستاذ خالد عبد الصمد، خالد عبد الصمد كان أستاذي بدار المعلمين كنت عاملة عنده بحث وهوي بيعرف إنه كان يعرفني أنا وبتار المعلمين، والطالبة بين الصبيان والبنات الوحيدة اللي تخرّجت ومعها بكالوريا علمي وفلسفة. فلسفة لأنه ما قدرت أعمل ماتيلام وراها، ويعرف مستواي التعليمي. وكان قابل، يعني هوي قلّه لمدير التعليم الثانوي، حكاية عني، وقلّي مدير التعليم الثانوي احسبها مدرسة بيك، يعني بهالمعنى. لكن بعد قليل تغيرت وصار فيه، لما صار في وساطات. دائماً دائماً كان في خلافات بيني وبين السياسيين. كنت عم أحكي عن السياسيين، تذكرت الآن هذه المعلمة اللي اسمها "نادية الشاب" اللي بالخارج، قدّموا له، كنا بحاجة لكم ساعة طبيعيات. فهذه كانت الأنسة وقتها لا بعرفها ولا بتعرفني. وحدة كانت خريجة الثانوية، بس هياي كانت طالعة الأولى بالدورة وهيايكي وسط. فبالوزارة، أو الموظف اللي تابع لحدا سياسياً، قال إنه هياي عن الثانية بده يعيها، بالثانوية، بده يجيبها عالثانوية. قلناهم أنا لا هياي الأولى طالعة بالثانوية. ما حدا عنده، قال إنه لفلان. قلت يا عمي لو أنا، واحد

عنده عقل، أنا مديرة الثانوية، ومسؤولة أخلاقياً عن الثانوية، مسؤولية أخلاقياً وشرعاً هيدي بتقول. إنه أنا بترك الأولى ويجيب الوسط؟ بأيأ بأيأ أخلاقيات، أنا لازم نام وراسي مرتاح، أنا بدي نام مرتاحة، مش الآخرين يرتاحوا. أنا يرتاح، والآن أقول، إنه صحيح مرحلة الثانوية كانت جزء منها معاناة أو أخرتني ببعض الأمور. أخرت تفرغي في الجامعة وكذلك، لكن كانت مهمة من هل الناحية. أولاً إنه أنا أتفرغ بالجامعة ومن دون جميلة حدا، بس كل كل الناس بتعرف إنه أنا بقيت عشرين سنة ما تفرغت بسبب الإدارة وبسبب المواقف اللي وقتتها. وهيدا يعني أمر، لأن أدركت إنه كان جيد بس بوقتها كنت عم عاني.

ن.ر. [01:46:08]: عم تعاني.

د.ع. [01:46:09]: بس هلقت نسيت المعاناة إنه سئلت دائماً أحياناً أسأل، ندمتي على شي عملتيه؟ أنا بقول كل شي انعمل، كان لازم ينعمل، بمعنى إنه الواحد، لو عدت مرة ثانية، لا ما بدي عود مرة ثانية. خلص الحياة ببيعشها مرة وبيخلصها. إنه هذا دور عليه ب أوديه، يعود بيرجع يؤديه مرة ثانية. لا. ما يؤديه. ولا ندمانة على أي شي على الإطلاق. يمكن أحياناً يمكن بمرحلة معينة إنه صار في خلاف مع حدا من السياسيين أو شي بسبب هيك بقول مش ندمانة، بس أقول إنه لو كنت أكثر حدة، أقل عفواً أقل حدة مش أكثر، أقل حدة في النقاش يعني بمعنى

ن.ر. [01:46:55]: مسايرة.

د.ع. [01:46:56]: إيه، بمعنى هيك أنا شخصيتي، خاصة حين يتعلق الأمر بهؤلاء الذين يتظاهرون بالدين ويفرضون أمور يعني كما قلت إنه بالنسبة لتغيير الشهادة عن اللي سرقوا الثانوية. إنه القول أو الكذب بسيطة يعني هيدا ال

ن.ر. [01:47:20]: رجعتوا عرفتهم للي سرقوا الثانوية وقتها؟

د.ع. [01:47:23]: هني الولاد يمكن سافروا بس اللي إجوا سألوني مسؤولين، مسؤولين سياسيين، مش أهل الولاد.

ن.ر. [01:47:37]: بس كان بدي اسألك قلتلي التحقتي بجمعيات نسائية وبعدين لما صرتي مديرة المدرسة؟

د.ع. [01:47:43]: التحقت بالجمعيات النسائية وبذكر لجمعية تقدم المرأة، لجنة حقوق المرأة. يعني جمعية تقدم المرأة ما كان لها أي طابع حزبي، يعني بمعنى كان فيها من كل الأحزاب. بس لجنة حقوق المرأة بكل الأنشطة الاجتماعية والمظاهرات واللي بدك إياه كله شاركت فيه.

ن.ر. [01:48:08]: كيف بتتظري لموضوع حقوق المرأة والنسويات وهول القصص؟

د.ع. [01:48:15]: حتماً ما فينا ننكر دور الجمعيات اللي طالبت ببلد متخلف مثل لبنان بالحقوق. طبعاً يجب أن يكون هنالك مطالبة بالحقوق. بس لو لبنان غير لبنان، يعني لو لبنان دولة حقيقية كان هوي بيتولى شؤون كل هيدي الشؤون القضائية، ما يتبقى لمجالس، لل، يعني للطوائف. وبالطوائف منعرف يعني إنه بكل الطوائف من دون استثناء أيضاً الذين يتولون هذه القضايا قضايا الزواج والطلاق وغيرها مين هني. هني ناس موظفين بالدولة. بس يصير رجل الدين موظف تابع، أيبيني رجل دين، هو أصلاً كلمة رجل دين غلط. أي عالم، مفروض يكون عالم، بس هني بما إنه مش علماء كلهم بسموهن رجل دين، أي رجل دين تابع لرجل سياسي، أو يتقاضى راتباً. يعني هودي خير الملوك من صاحب العلماء وشر العلماء من صاحب الملوك. هيدا باختصار هيك رأيي. يعني في مثل، مذكور عندي بكتاب الشيخ البهائي وغيره، صاحب الملوك كرايب الأسد، يظن أنه فرسه فإذا هو فريسته. بينما هوي بيصير إذا وقع عن ظهره فريسته. بالنسبة للأحوال الشخصية، طبعاً هي أحوال شخصية متخلفة، والحديث عنها طويل جداً، متخلفة قلت لأنه الذين يتولون هذه الأمور تقليديين بكل معنى الكلمة.

ن.ر. [01:50:16]: عن مرحلة التدريس في الجامعة اللبنانية. هي دراساتك الأدبية أغلبها متعلقة بمواضيع دينية، صدر الإسلام---

د.ع. [01:50:24]: لأ هوي صادف، أنا بالصدفة سمعت

ن.ر. [01:50:27]: حتى ترجماتك عن الفارسية هي مرتبطة بالثورة الإيرانية؟

د.ع. [01:50:32]: عن الفارسية. لأ أولاً أنا أولاً أطروحتي الدكتوراه عن بهاء الدين العاملي

ن.ر. [01:50:40]: إنتي درستي أدب فارسي أو بس لغة؟

د.ع. [01:50:43]: أنا درست لغة، بس موضوعي الدكتوراه. موضوع الدكتوراه كان عن بهاء الدين العاملي، اللي درسته أديباً باللغتين هوي أديب باللغتين العربية والفارسية، ناثرًا وشاعرًا باللغتين العربية والفارسية، وكان فقيهاً مجتهدًا. هذا فهمي للدين بدأ، قلت غيرتني السفارة إلى إيران بهذا المعنى. الفهم هو كان من 400 سنة، إذا قرأت ما كان يقوله مثلاً من 400 عام، تجدين أن كل هذه اللغات الموجودة في هذا الزمن، إنه متخلفة بالنسبة إليه. كان فقيهاً مجتهدًا وكان عالم رياضيات ومهندساً في الوقت نفسه. وأنا درست كل هذه النواحي، مع إنها لم تكن مطلوبة بالدكتوراه، لأنه كنت أحضره كتاب. ولذلك جاء هذا الكتاب كبيراً مع إنه حاولت أن أختزل قدر الإمكان. إذا دراسة، هذه الدراسة اللي استغرقت مني بالأول لتحضيره كتاب يعني حوالي 8 سنوات وسعت مداركي وأنا معروف عني، والكل يعرفون إنني إن أمسكت كتاباً أقرؤه كله. يعني لا أقرأ فقط الفصل المتعلق أو الذي أحتاجه. وحتماً إنه المصادر والمراجع كانت بالعربية وبالفارسية. وعرفت الصراع العثماني الصفوي، الصراع المذهبي من خلال هذه الدراسة. يعني كل باب من أبواب بهاء الدين العاملي، هوي أطروحة مستقلة، كما قال الدكتور أسامة العانوتي وهو يناقش. يعني من اللجنة اللي ناقشت الأطروحة. يعني قال إنها أطروح في أطروحة واحدة. وهكذا قال

الدكتور ولیم الخازن، كل موضوع من المواضيع كان كأنه هوي تخصص. ولذلك معرفتي المعمقة بالدين هذه سببها، لأنه قرأت فقهياً وليس فقط عنه، ولا أقارن بينه وبين غيره. كنت على مهلي وكان في قصف وكان في ضرب، على الأساس في البداية كتاب وذلك لم أشأ حين سجلته عدت كأطروحة دكتوراه من جديد في لبنان، أن ألغي أي موضوع لا علاقة له بالأطروحة. هذا بدأت بالترجمة، أول مرة ترجمت، أول كتاب ترجمته، بالأول بدأت بترجمة ترجمة النصوص التاريخية التي أنا بحاجة إليها، أو من آثار الشيخ البهائي، التي هو آثاره بالعربية والفارسية، لأطروحة الدكتوراه. بعد منها أول كتاب ترجمته كتاب اسمه التدين والنفاق، هو اسمه باللغة الفارسية [غير واضح—تذكر الاسم بالفارسية] يعني القط والفار. هو ينتقد فيه ينتقد في هذا الكتاب، هذا تحدثت عنه بالأطروحة وقلت قليلاً وقلت لأنه فيما بعد سأترجمه. وترجمته فيما بعد نشرته، نشره رياض الرئيس، هذا كان أول كتاب. لأنه مرتبط بالشيخ البهائي، يعني لم يكن المقصود أن تكون دراستي دينية. أنا الماجستير عن المرأة في الأندلس. كنت مسجلة بالجامعة اليسوعية أدب أندلسي، إنه الذهاب إلى إيران والسماع باسم بهاء الدين العملي بالصدفة وأخذت قرار أن أتابع هذه الدراسة. فالكتاب الأول كما قلت برياض الرئيس، شركة رياض الرئيس للطباعة والنشر. نشره واقترحوا إنه نسميه، نغير القط والفار ونسميه التدين والنفاق، هوي بيحكى عن، هوي الشيخ البهائي، كل شي يشعره الفارسي هنا مبسط، على طريقة كليله ودمنة. القط يمثل رجل الدين المحتال، والفار يمثل المتصوف كمان الطرائقي، لأنه هو عنده مبدأ يقول "من تصوف، من تفقه ولم يتصوف فقد تفقه". يعني إذا غلب الظاهر على الباطن. يعني هيدا انا تعلمت منه قصة الظاهر والباطن، عن الظاهر والباطن. "ومن تصوف ولم يتفقه فقد تزندق، ومن جمع بينهما فقد تحقق". وكان أعطى كثير وقتها هذا الكتاب بالعالم العربي وبالخارج أعطى صدى. بعد منها ترجمت القبض والبسط للفيلسوف الإيراني الدكتور عبد الكريم سروج، فيكي تعرفي كمان أهمية هذا الكتاب، كان مشهور، يعني باكرًا بعدنا بالتسعينات عم نحكي، أهمية هذا الكتاب أو أهميته إنه بيحكى عن التمييز، بميز بين الدين وبين المعرفة الدينية. إنه يعني، هيدا انتهي الدين شيء، الدين مقدس، النصوص الدينية المقدسة بس فهمها غير مقدس. يعني ما يقوله الفقهاء أو الشراح غير مقدس. وكذا. وفي كتاب ثاني، الكتاب اللي صدر عن دار الساقى، كتاب "رفسنجاني: حياتي". هيدا انا وافقت وقتها على ترجمته لأنه بيحكى عن التحضيرات للثورة من سنة الستينات، لأنه بالنسبة للعرب، بفكروا إنه والله رفعت شعار تحرير فلسطين بعد نجاح الثورة الإسلامية. هتي بسبب شعار تحرير فلسطين من سنة ال 62، وهني اللي كانوا عم يحضروا للثورة، كانوا ملاحقين. أنا فلسطين بتهمني أكثر. وعشت أحداث الثورة الإسلامية، يعني عشت هيدي الأحداث اللي كانت ثورة مختلفة. بعد بالتاريخ أساساً، ما صار ثورة مثلها. وعلى فكرة ممكن أنا استطرده يعني لحتى ما يكون ولا يُظن إنه أنا من منطلق، من أي منطلق اخر. إنه انا أترجم ما له علاقة بالثورة الإسلامية في إيران. أنا مع الثورات. يعني أنا بالحج بعطي هذا المثل، أنا ذهبت بعد غياب ابني بالسنة اللي بعدها، مع مجموعة إلى الحاج. أنا طلبت أن أكون، أن أسافر إلى الحج مع مجموعة يعني لا أعرفهم، كان قصدي. فالمهم، هناك بالباص، كان في إحدى، في يوم بدنا نروح على الحرام. كانوا من فنزويلا، لبنانيين من اللي عايشين بفنزويلا، اللي ذهبت معهم. أنا كنت بالباص في 12 شخص غيري، 12 كان وقتها بال 2012 كان في انتخاب، إعادة انتخاب تشافيز، بفنزويلا. كانوا عم يتناقشوا، أنا كنت وقتها، ما عندي نفس أساساً لأناقش بالسياسة ولا أهتم. بس استنتجت من خلال نقاشهم، كان امرأة وحيدة بال، هتي 12 كل واحد هوي وزوجته، اثنين. في وحدة منهم، بس وحدة مع تشافيز، وال 11 يعني حتى زوجها ضد تشافيز. أنا استنتجت من خلال نقاشهم، وهني عم يتناقشوا، عرفت ليش ما بدهم يصوتوا. هني اللبناني أغنياء فنزويلا، أو الأثرياء، ما بدهم يصوتوا، يقترعوا ل تشافيز، لماذا؟ لأنه تشافيز حدد ساعات العمل للعمال وهني بيستغلون ليلاً نهاراً. هيك بتستنجي من النقاش. هوي محدد، يعني في دعم للمواد الغذائية الأساسية. طبعاً هني كانوا بيتاجروا فيها، من الرز والسمن والزيت والحليب وغيره. فانا قبل ما ننزل من الباص قتلهم "هلق كلكن جايين تحجوا، تشافيز عم ببطبق ما دعا إليه الدين، الإسلام أو غير الإسلام وإنتم ما رح تصوتوا لتشافيز. هلق اللي ما رح يصوتوا لتشافيز حجتهم مش مقبولة. قبل ما إنزل. بس هيدي المرأة حجتها مقبولة. قبل ما إنزل". يعني هيدا نموذج. أنا تشافيز، وإنه الآن موقفي وشعوري، مع فنزويلا ضد أميركا طبعاً. أمر مفروغ منه، أنا هيك مش لأنه هوديك مسلمين. لأ. أنا مع، قلت، أنا مع فلسطين ومن معها، وضد إسرائيل ومن معها، ونقطة على السطر. مش ضد هيك. أكرههم. يعني حتى العرب، حتى العرب جبراني جبراني، خلص في. أو هنا أو هناك. يعني المسألة ما فيها حرية إطلاقاً. بالنسبة إلى أنا على المستوى الشخصي، ما في حرية رأي، والله الرأي إيه واحد مع التطبيع واحد ضد التطبيع. طبعاً أنا ضد التطبيع، ضد إسرائيل على العمى وضد اللي معها على العمى أيضاً، يعني ما في حل وسط.

ن.ر. [01:59:47]: أه عشان هيك كنتي مترددة في أحد المرات، إنه تسافري إلى إلقاء محاضرة في عمان بتذكر؟
د.ع. [01:59:53]: بعمان أنا رفضت طبعاً. مع إنه أنا الآن أقوم بأبحاث للأدب المقارن، بجامعة اليرموك، وبالجامعات الأردنية، لكن أنا رفضت روح على عمان لأنه إبني طيب و بدّه يسافر كان على الأرجنتين من أوتيل ديو [Hotel Dieu] باعنيته كانوا باعنيته مع فرقة رياضية. ومع ذلك، وقتها وقت كان في أحداث أو شي ببيروت، ومرقوا عن طريق الأردن، فتشله إسرائيل، كان اللي عم يفتشله كمبيوتره. أنا قتلهم أنا مش ممكن، أنا ما ينسى هيديك المرة، الاسرائيلية اللي شفتها أو الإسرائيلي اللي إجوا واحتلوا. قتلهم لا أنا ما بروح على مكان ممكن إتلقى فيه بإسرائيليين. يعني يستحيل، ممكن إتلقى

بشخص يهودي، بس إنّه بناقشه بناقشه إذا كان يهودي كان مع إسرائيل أو ضد إسرائيل. يعني بسأله بسأله مباشرة من دون ممالأة بسأله رأيه هيك، حتّى لو يدهم ياخدوني على السجن يعني.

ن.ر. [02:01:05]: بس اتفرّعتي للتعليم بالجامعة اللبنانية، تركتي الإدارة بالثانوية؟

د.ع. [02:01:10]: هو لتفرّعت، أنا كان مفروض إنّه اتفرّغ من سنة الـ 90 بالجامعة [تضحك]. ما تفرّعت للـ 2007، مع مجموعة، كنت أنا الوحيدة إللي صرلها 19-20 سنة.

ن.ر. [02:01:25]: بس بعدك بتيجي على الثانوية.

د.ع. [00:08:36]: لأ بيجي على الثانوية لإنّه نصف الكتب موجودة بالثانوية هيّي لأنا أهديتها يعني وضعتها وأحياناً بتضطر إجي راجعها. في بعض الكتب كان بال، يعني أنا أهديتها للثانوية. وبعضها مختوم، إلي مختوم مختومين مش ممكن اخدهم. وفي بعض المصادر والمراجع. وبعد حتّى الآن إللي بالثانوية عم يشتغلوا إمّا تلميذاتي، أو معلّمت كانوا لمّا كنت مديرة يعني بعد في إلفة بيني وبينهم. وهني كلهن عندهم إحساس إنّه المكتبة جزء منّي لإنّه أنا إلي أسستها. طبعاً مش عم ربّحهن جميلة. بس نصف الكتب من بيتي [تضحك] وكتبي موجودين. لكان بعدها، حتّى الخدم في الثانوية بيستقذولي لمّا بتأخّر وما بيجي، ويمكن أكيد بعد شوي بتتغيّر.

ن.ر. [02:02:20]: ليه عملنا اللقاء هون؟ ليه حبيّتي إنّه يكون اللقاء هون بالثانوية؟

د.ع. [02:02:24]: حبيّتي يكون اللقاء بالثانوية، أوّلاً إنّي كطالبة كنتي بالثانوية وقت كنت أنا مديرة فيها. وبيكون يمكن أكثر حميمية، ببيكون رسمي أكثر من اللقاء بالمنزل. وعادة حتّى طلاب الدكتوراه إللي بيكونوا من منطقة بعيدة وما يدهم ينزلوا على صيدا، لإنّه، أنا لمّا بسجّل الطالب معي بشارطه إنّه بلتقي فيه بالفرع الخامس بلا ما إنزل على بيروت. ما بنزل على بيروت بهل إيام إلّا وقت يكون عندي مناقشة يعني بالمعهد العالي للدكتوراه، أو بالدكوانة بالعمّادة. فالبعيد عليه بصيدا وأقرب عليه بالنبطية، بعطيه موعد هون بمكتبة ثانوية البنات. فهيدي مكتبة الثانوية ما كان يصحّي أنا ومديرة إجي أقعد فيها، فيما بعد عم إجي. ويقعد أحياناً، وبيصير في تركيز أكثر، أنا بالنسبة إلي أحياناً يشتغل هون، ببيصير في تركيز أكثر، كنت إجي اشتغل أكثر، هلّق بعتي مواعيد هون.

ن.ر. [02:03:33]: إذا بدي إرجع لموضوع الأمومة بحياتك، كيف كنتي تريّ ولادك، مثل ما كانت إمك إنّه...؟

د.ع. [02:03:41]: أنا مثلاً فيّ قول، أنا ولادي، من عمرن أوّل ما يتعلّموا فكّ الحرف بيبدوا بالقراءة. أنا بنتي قرأت سامر، أوّل ما طلعت سامر كان عمرها 5 سنين. فقرّوا متقّين، وإختصاصاتهن علمية ومع ذلك عندن ثقافة واسعة وشاملة. يقرّوا، طبعاً أنا قرأت بالفرنسي والفارسي. هني بيقروا ما بيقروا فارسي، بيقروا بالفرنسي عربي وفرنسي وإنكليزي مثلاً. أنا إبني طبيب بأميركا مثلاً، هوّي درس باليسوعية واشتغل بأوتيل ديو وهلق بأميركا عم يتخصّص وعم يشتغل باللغة الفرنسية، بيحكي مع المرضى إللي ببيجوا على المستشفى من المكسيك أو هيك بيحكي معهم بالإسباني، هوّي تعلّم على نفسه اسبانيولي [Spanish-Espanol]، طلّعوا ببحبوا اللغات. يمكن كان تأثيري أحياناً بقلهن بعنذر منهم إنّه حملنك هم كبير إنّه هذا الهمّ الثقافي ببيصير عبء على الشخص. يمكن يكون عبء. إبني علي مهندس وعایش بألمانيا، كمان يعني بيعرف أكثر من لغة، وبيقراً خارج إختصاصه الهندسي، ودائماً بيكتب نصوص أدبية، ما بينشر بس بيكتب. ورفيف بنتي رفيف مترجمة وتجد أكثر من لغة. تأثروا بالقراءة المبكرة، يعني هني خلقوا وهني عم يرضعوا وإمهن عم تقرّوا بالكتاب وهني عم تُرضع، فشي عادي القراءة بالبيت شي عادي.

ن.ر. [02:05:27]: كنت تلحقي بين أعباء المنزل وتربية الأبناء والتعليم؟

د.ع. [02:05:30]: هلّق أنا ما بطلب، ما بطلب من كلّ النساء إنّه يشتغلوا إللي انا اشتغلته. بس يمكن الله سبحانه وتعالى معطيني قدرة إني قوم بهل أعمال مع بعضن. يعني أنا كنت كون واقفة عمالي أطبخ، وحاطة ورقة وقلم، بدي إكتب مقدمة لشي فصل. لمّا كنت عمالي أعمل دكتوراه، وما كان عندي لا خادمة ولا حدا يساعدي وكنت مسرّبة بالنظافة. بمعنى لازم يضلّ البيت نظيف. كون في كون عم أطبخ، ودائماً في دفتر وقلم بكلّ الأجزاء في المنزل. بعطيك مرّة مثل، مرّة إنّه كيف كنت لحقّ. يعني أكيد بشتغلن مع بعضهن، بشتغلن مع بعضهن. مش بالدور. يعني بمعنى إنّه، إذا بدك تشتغلين بالدور ما بكفي الأوقات. مرّة كنت أنا كلّ يوم خميس صباحاً روح على الجامعة وإرجع الساعة، روح على صيدا، أنا بيتي بنصّ الطريق، بين صيدا والنبطية، الجامعة بصيدا بدي علم، وبدي إجي على الثانوية. كنت يوم الخميس مثلاً روح صباحاً، على صيدا، وإرجع الساعة 12 على الثانوية. ففي يوم ما كان في جامعة بصيدا، تلفنتلن على الثانوية فتلنهم ما في جامعة، وبدي إبقى بالبيت بدي نظف البيت. أنا وعم نظف، وصلت على الدرج أنا وعم أشطف الدرج ملان ماي، وقفت سيارة هيك عتيقة، نزل شخص. أنا كنت لابسة هيك شي ورابطة إشاربي لورا. قلّي هون بيت الدكتوراة دلال عباس. فكرني الخادمة. قلت إيه تفصل. طلّعتُه أنا على الغرفة مباشرة وردّيت الباب حتّى كفيّ الماي، قيم الماي. هلّق هوّي استدرك بعد ما قعد، بيعرفني، مش بيعرفني هيك، إنّه شايفني أو شي. استدرك، قلّي بعنذر إنّه سألتك هيك، بس سؤال قبل ما قلّك أنا شو بدي. هوّي مدير مُعيّن مدير جديد وبده يسألني بعض الأسئلة. لمّا جايي على الثانوية دلوه على البيت. المهمّ، "بدي اسألك سؤال قبل ما قلّك أنا شو جايي أعمل. إنّه إنت مديرة ثانوية وعندك كتاب، إنّه بتعلمي بالجامعة وكذا. إيمتي، كيف منظّمة وقتك." قلّته "أوّل شي لا مش كتاب، صاروا 4"، وقتها كانوا 4 كتب، 4" ومش منظّمة وقتي لإنّه إذا بدي نظم وقتي ما بكفي، يعني ما بكفي 42

ساعة، كلّه متداخل ببعضه". قلنّه "ليك أنا بنام بكّير وبفيق بكّير كثير، بيكون عندي شي بدّي اكتبه بعمله وبنفس الوقت أنا بطبخ وبحضّر. وولادي معودين. أنا ما درّست ولادي، ولادي متفوقين لأنّه أنا اعتمدت مبدأ إنه هني يعتمدوا على نفسهم. أنا ولا مرة درّست، كنت تكون راجعين كلنا مع بعضنا من المدرسة كون أنا دايرة ضهري، عم إجلي. هوي وواحد عم يقرأ، أنا رد صحّله. لأنّه أنا أتذكّر، إنه نحنا 8 ولاد، تعلّمنا وعلّمنا دراسات وغير جيل ومدارس كانت أدنى مستوى، وتابعنا دراستنا وما حدا درّسنا. وولادي أبداً ما درّستهم. فالهمم إلا طبعاً إذا يسألوا سؤال نجاب، بس نجاب وكون عم نشغل شغلة ثانية، مش متعديهم، وقاعدين وأكتب أو أضع العنوان. نصحت كثير ناس هيك، وما ردّوا عليّ. أنا هذا المبدأ اللّي اعتمدته بتدريس بدراسة أولادي يعني. فالحمدالله رب العالمين منقول.. ففرحيته، قلنّه هيك قلنّه ما بيتنظّم الوقت. فرحيته قلنّه عمول معروف شوي. فرحيته في خزانة أهدية على المدخل، عليها ورقة وقلم. قلنّه "لما شفنتي عم أشطف الدرج، خطرت عيالي عبارة طلعت كتبها وكفيت، بكون عمالي، بكون بالبيت عم حضّر للجامعة أو عم ترجم مثلاً أو عم أقرأ شي كتاب، بيخطر على بالي بدّي أعمل إجتماع بكرا بالثانوية، بدّي قول كذا، بحط النقاط الأساسية على جنب. بكون بالثانوية بكتب شي ما خصّه بالثانوية. يعني متداخلة ببعضها. ويمكن نجاحي بإدارة بالثانوية سببه إنه كان عندي أشغال ثانية، ذهني، ذهنيّاً ما كنت متفرّغة للثانوية. تركت كل واحد يقوم بمهمته، هنيّ مشكلة المديرين بالمدارس إنه بيعتبر إنه هيدي المدرسة كأنها إله يعني هوي بيقوم بكلّ الأعمال. ببصير حامل كلّ الأعباء على ظهره. أنا يمكن مش متأكّدة، من دون ما وقّع، كان كل واحد مسؤول عن عمله. اللّي بيقوموا فيها. لما عملوا دورة للمديرين وأنا شاركت فيها منشان السفر على كندا للدورة، كل اللّي كانوا عم يعطوه إنه عن توزيع المهام، أهمية عمل المدير بتوزيع المهام، قلنّهم "أنا والله ورّعت هالمهام من زمان مش لأنّه بعرفها إنه هذا الأساس بالعمل الإداري. لأ. ورّعت المهام لأنّه ذهني كان مشغول بشي ثاني، حتّى ما كون مشغولة بكلّ الأمور. كنت شوف الأمور مجملّة بالثانوية أكثر من الأمور التفصيليّة. الشي المهمّ بالنسبة للثانوية، أوّل ما نقلنا على الثانوية، انتقلنا نحنا، نصف، يعني قسّموا ثانوية الصبح قسّمين، نصف الصبيان، ثانوية الصباح. ونصف البنات، نصّ البنات، إجوا البنات بنصّ السنة. أوّل شي وضعوا مثلاً دفتر الدوام. عادةً بكلّ المدارس المدير بيتركوله فراغ، إنه المدير ما بيدخل على غرفة الأساتذة فيبتكروله. يعني عامل إنه هوي هيبه مثلاً بإدارته. بيتركوله فراغ فوق وبيمضي بيوقّع اسمه. فأوّل شغلة، أوّل شي عملته، هيدا من أوّل يوم جينا فيه، لاقيتهم تاركين فراغ. قلنّهم "لأ، أنا ساعة اللّي بوصل بمضي". فقلت لهم هيدي العبارة، المدرس اللّي أنا حافظته وقت كنت أنا علّمه بالثانوية، للطلاب إنه "من نصّب نفسه للناس إماماً فليبدأ بتعليم نفسه قبل تعليم غيره، وليكن تعليمه بسيرته قبل تعليمه بلسانه". أنا كيف بدّي حارج إستاذ، إجا مأخّر، وأنا جايي مأخّرة لنفترض. وأنا بدّي إمضي إنه جيت سبعة، وهوي طالبه. لأ أنا أنا حتّى لو نسيت فوت على غرفة الأساتذة ووقّع بوقتها، بوقّع متأخرة. حتّى ما حدا يقول إنه إجت. أنا كنت قبل النظّار، إجي بس يمشوا ولادي على المدرسة بالأوتوكار، أطلع بسيارتي وإجي على الثانوية باكراً. حتّى وقت اللّي يكون في قصف، لأنّه إذا تأخرت وما جيت بيكون في قصف بعيد، ممكن الحجاب، أو النظّار اللّي بدهن يعطلوا يقولنّ إنه والله في قصف. إنه روح مرّات لأن كان يصير كثير قصف بالمحيط، يجوا يسألوا الطلاب، إنه والله ما في طلاب كثير، بلا روحوا. عرفتي؟ إبطر أنا إجي قبل الدوام لحتّى خليهن، يعني إذا ما علّمناهن نحنا وفي قصف، ما كانوا تعلّموا أبداً لو ما منصمد معاهن. يعني في أمور إيجابية من، عملناها انشاء الله تكون ميزان الحسنات.

ن.ر. [02:13:14]: انشاءالله. ما كان عندك عاملة منزلية لما كنتي عم--؟

د.ع. [02:13:21]: لقلّك. بمرحلة معينة لما عملت في، يعني قبل مديرة، كان في ضائقة ماديّة. بمعنى كانت رواتبنا كثير متدنّية لدرجة، وما كان في، أصلاً ما كان في عمال منازل. كان في قصف، ما كان حدن، ما كانوا يجيبوا عمال دائمين. وما كنتي تلاقي كثير ناس يشتغلوا وكان أحياناً نجيب يعني عاملة كلّ أسبوع أو أسبوعين مرّة إنه تساعد بتنظيف المنزل وأحياناً لأ.

ن.ر. [02:13:53]: مههم. عندك أربع أبناء؟

د.ع. [02:13:57]: عندي أربعة إيه، بنت و3 شباب.

ن.ر. [02:14:00]: بضايقتك شي إذا حكيتي عن فقد الإبن؟

د.ع. [02:14:04]: لأ هلق خلص، هلق مش إنه بضايقتي بمعنى، بس هنيّ أصعب شي، هنيّ أصعب شي ممكن يمرق بالحياة. يعني شوفي، بس إختصاراً بقول أوّل شي إنه، إبنني حسن اللّي أنا فقدته بال 2011، وكان بكامل صحته وقوته. هوي كان الله معطيه، كلّ ما كان يميز واحد من 3 غيره، كان موجودين فيه. وكان حتّى وهوي إخوانه مسافرين، كان غانيني عنهم، يعني بمعنى كان رفيقي وكان يساعدي. وعم يعمل طبّ. المههم، هوي كان مخلص طبّ أسنان وعم يعمل إختصاص، وهوي نايم صار في انفجار بالشریان. المههم، طبعاً المسألة أصعب ما يمكن تتصورّي. بتتخيّلني إنتي لو ماتت البشرية كلها بهالمعنى في أحد الشعراء، التهامي يقول، عليك-- المههم، إلو بيت بهالمعنى، إنه بهالمعنى الآن لا يخطر لي البيت، بيستخدموا بعاشوراء هوي للشاعر التهامي، يقول عن ابنه. المههم، كانت المسألة المسألة بالنسبة إلي كثير صعبة ومفاجئة. حتّى يومها، أنا يوم الوفاة بالتحديد، كنت عم عزّي ناس، ونحن راجعين على الطريق، كنت أنا، كنت عمالي قول، "كيف بيعيشوا الإّمات لما إذا فقدوا ولادهم؟". بعد سنتين أنا تركت، أوّل سنتين تركت التعليم، جبروني بالجامعة أخذ ساعتين. تركت الإشراف، كان عندي طلاب بجامعة، بالجامعة اللبنانية وجامعة خاصة، طلاب مشرفة عليهم بالدكتوراه وبالمجستير. تركت الطلاب،

في شي 2-3 بقبوا هني، نظروني لحتي بس، والباقيين تركتهم. يعني عطيتهم لحدا آخرين. وتركت البيت وجيت عشت عند بيت أهلي، يعني بس امرق على البيت آخذ كتبي أو غير تيابي.

ن.ر. [02:16:14]: انتي تركتي البيت؟

د.ع. [02:16:15]: عند بيت أهلي بالنبطيّة لأنه قريب للمقبرة، لأنه لضلني رايحة جايي على المقبرة. حتّى مرّة أنا ومارقة، إنه ما نقول أمّي إنه رايحة جايي. بس إنه أنا كنت مارقة وميّلت، بعد سنتين مباشرة أنا فقت استيقظت صباحاً ما يقشع. المهم إختصاراً، صار عندي جلطة على عصب العين، أعصاب العينين. وأنا قرّرت أنا وبالمستشفى، أنا قلت تذكّرت شغلّة، صارت معي، أنا وبالمستشفى تذكّرت، إني أنا قلّلتك بالـ 2012 كان صايرله حسن سنة. أنا رحنت على الحاجّ لأنه في حدا بدّه حجّ له. هونيك قبل ما تبدي مراسم الحاج، بيطلعوا الشباب والصبايا بيطلعوا على-- بيشفوا بيطلعوا على محل اسمه جبل النور، بيطلعوا عليه ليشوفوا هونيك فوق منه غار حراء، وراه غار حراء. قمت أنا طلعت، كنت متضايفة لدرجة، قلت بدّي إتعب جسدياً لحتي إرجع إقدر نام لأنه قبل بيوم ما نمت. ما كانت بعد بادية المراسم. شفّتهم أنا هني وطالعين سمعت رجّال عم يقّلها لمرته، "شو فزعانة عليّ إذا طلعت؟ هيدي المارقة إمّي وطالعة". أنا سمعته يعني عم يقول عني. بس أنا طلعت وكثير صعبة الطلعة وما في درج يعني يطلعوا عليه مستقيم. هلق طلعت لفرق، وصلنا لفرق كان في ضباب وهيك وحسيت إنه انا كثير قريبة من السما. ودعيت وصليت ركعتين فوق ونزلت. هلق أنا ونازلة هون الصعوبة صارت. كنا كثير صعبة النزلة لأنه الأرض مش مستقيمة، وما في درج مستقيم وما في شي تستندي عليه. وكنت حذرة، ما بدّي أوقع ولبّك حدا فيّي. أو إنه كنت عم إحسب إذا وقعت وانكسرت قلت إذا تمت دغري منح خلص بيدفونني هون وخلصنا. بس أنا يمكن تنكسر إجري أو إيدي أو شي كيف مين بدّه يحملني وياخدني ويرجعوني على لبنان أو يلبّكوا أهلي ييجوا ياخدوني؟ هيك صرت فكر، قد ما لقيتها وانا وعم بنزل وعمّالي إطلع بكلّ خطوة وعم إخطي وأنا خيفانة أوقع. مش خيفانة من الموت خيفانة أوقع، وإيه فكرت ساعتها فكرت إنه هيدي الحياة مش، هيدي الحياة هيك. القسم الأوّل إللي قيل، من أوّل حياتك لحدّ حسن، لحدّ ذهاب حسن، هيذا كنتي فيكي تغيري في شي، تبطلي الإدارة، تبطلي الزواج، تبطلي أي شي، تغيري البيت أي شي، بتغيري-- بس ما تبقي بذكّ تكفيه مثل ما هوي.

ن.ر. [02:19:04]: مُجبرة.

د.ع. [02:19:05]: مُجبرة، هيذا القسم، مثل النزلة، الطلعة كان فيّي إرجع، أنا وطالعة على هيذا الجبل كان فيّي إرجع، لكن النزلة إلزاميّة. ما فيّي ابقى، فوق، بدّي كفي، بدّي إنزل. هلق كانت صعبة أو مش صعبة بدّي إنزلها، مثل ما عم بنزل، هيك كنت عم فكر، مثل ما عم إنزل بهالصعوبة لازم كفي. بس ما طبقتها، بعد سنة تذكّرت هاي هال قصة. أنا وبالمستشفى، قلت مثل ما قلت أنا وقتها أنا وطالعة على جبل النور، أنا هالقسم من الحياة بدّي كفيه، وخاصةً إنه يومتها، هني وعم بنزلوني رابع أو خامس مرّة على الصورة، تصوير الدماغ، أتصل فيّي أبني من أميركا وزعلان، إنه لرابع يوم لعرف. فأنا قلت إذا بتحبي الباقيين ما بتلبيكهن فيكي. يعني بمعنى إنه أنا ما كون عالّة عليهن، لأنه الموت والحياة مش بايدي، هيك أنا صرت إحكي الممرضة أو إللي جارتني أو إللي جاررني. نسيت يعني إذا كان ممرّض، سامعني عم إحكي بصوت عالي، إنه "يا دلال هيذا القسم هاي الحياة بذكّ تكفيها، بذكّ تشتغلي". وهيك رجعت اشتغل. رجعت اشتغل بس بصعوبة، بصعوبة يعني غير متناهية. ما قدرت، لا قدرت ركّز على العمل، إنه هيذا عملي انا القراءة والكتابة. مش بسهولة بأول سنوات، ورجعت زملائي ساعدوني إنه مثلاً، في طلاب دكتوراه هني حضرولهن المخطّط، يعني ساعدوهم بتحضير المخطّط بس أنا وقعت. أوّل سنة سنتين. عن غير رغبة بمعنى بس إنه أنا بدّي اشتغل، وهلق بشتغل حتّى بوجود العاملة المنزلية أو بعدم وجودها بشتغل. بكتب وبترجع؟ ترجمة، بكتب. هلق ما تبقي عندي من الوقت، الكتابات القديمة المؤجّلة، عندي عدد من الكتب، ما أنجزوا بسبب الإدارة [تضحك]. لنفترض إنه واصلة لمراحل فيهن، مثل ما هودي الكتابين الأخيرين إللي وقّعناهم هيدي السنة. فيدي أنجزهم، بشتغل قدر الإمكان. يعني مش وقت طويل. يعني كنت أنا أقعد اكتب وأقرأ 12 ساعة. هلق لأ. ما عندي قدرة على هيذا الوقت ركّز لأنه بيحكمني صداع لما بيحكمني صداع ما باخد أدوية للصداع. بنزل على الحقيقة، أو بقعد أنا بيتي على أعمدة، بقعد تحت الأعمدة، بسرح يعني عندي منظر بعيد بسرح بقراً أشياء خفيفة مثلاً. هلق لما بيكون بعض الضهر، يعني تعبانة أو شي، رجعت إساً من جديد كافيّ حالي أحياناً، بروايات نوع مش بروايات لأنه لما ما بيكون فيّي ركّز، بس على شرط بدها يعني كنت بالأوّل أقرأ أياً رواية معقّدة ولها أبعاد. هلق لأ يقول مش مضطّرة، يعني بمعنى إذا ما كنت عم بعمل دراسة عنها مش مضطّرة تابعها. شي سهل شي خفيف لحتي أعطي حالي دفعة لإقدر تاني يوم، عود إرجع إشتغل بالشغل إللي عمّالي اشتغله. ممكن صحح، ممكن أقرأ. طبعاً عندي غير الأطاريح، ممكن أقرأ طلاب أدباء مثلاً هلق براجلهم دواوينهم. مين ما طلب منّي براجع الكتابات بصحّحها بصحّحهن إياها. بساعدهم، بهيدي الإشبيا. طبعاً قراءة كتاب مش إنتي مؤلفنيه أسهل نقده، من كتابتك إنتي. يعني ممكن يكون نوع من الهرب من العمل، إنّما كلّه شغل. ويعني أنا من مبدأ مبدئي زكاة العلم إنفاقه. يستحيل إنه حدا يطلب منّي شي له علاقة بتوضيح نقطة معينة، أو قراءة كتاب أو تصحيح شي، وما جاوب.

ن.ر. [02:23:36]: كان بدي إسالك قبل عن سؤال-- إنو في بعض الأفكار الدينية هي بالظاهر لغير المتفهمين أو لغير العلماء بالدين يشوفوها إنها فيها ضد حقوق المرأة مثل الإرث، وموضوع الزواج المتعدد للرجل، ومثل موضوع مثلاً الضرب الخفي وهي قصص—

د.ع. [00:08:36]: ليكي باختصار، عن كل هالأمر، بقلك شي. الدين الحقيقي، أي دين الإسلام وغير الإسلام، الدين بيدي للعدل. المبدأ الأساسي بالإسلام هو العدل وعدم الظلم. أي شي في ظلم، بلا ما ندخل، أي شي في ظلم، الظلم بيكون أو من اللي عم بيقوم بالظلم، أو من اللي عم يفتي بالظلم. وهيدا الأمر يعني ينطبق على كل ما له علاقة بهيدي الأمور. عن تعدد الزوجات مثلاً لنفترض إنه تعدد الزوجات. في أمور في الدين، وإسلامياً بالتحديد في آيات بالقرآن، في آيات متشابهات وفي آيات أحكام. في آيات واضحة تماماً. اختصاراً ممكن نقول مثلاً بالنسبة للإرث. والله عنده بالنص، بالنص، إنه للذكر مثل حظ الأنثيين. بس في شرط شو هو. الشرط الأساسي هو إنه الرجل هو الذي يتحمل النفقة، ممنوع منعاً باتاً لو مرته عندها أموال، الأموال هارون وقارون، هو عليه واجب الإنفاق. يعني هيدا أمر مفروغ منه، هلق اختلطت الأمور ببعضها. يعني بمعنى إنه والله أحياناً الإزواج اللي نساين عاملات بيتكلاوا عليهم أو صار إنه بيصرفوا على الطريقة الغربية نص نص، إلى آخره. هلق نحن عم نحكي عن المبدأ الإسلامي العام، لأنه ممكن المرأة إنه ما تشتغل بشكل عام بس هو واجب النفقة، بس هي مش واجبه، هي مش واجبه. هلق بدنا نسأل مش، ليش إنه والله المرأة بتأخذ نصف حقوق الرجل؟ بدنا نسأل ليش معظم المسلمين، 90% من المسلمين ما بيعطوا المرأة حقها حتى هذا النص! يعني مثلاً، في مسلمين وهي الأكثرية بالعالم، إذا كان مات الرجل وعنده بنت وحدة، عنده بنت، ما بتورث، بتورث هي النص وإخواته بيورثوا النص الثاني. النص القرآني واضح إنه هي بنت اللي بتورث. وهو الله سبحانه وتعالى، مؤتله، لم يعيش للنبي أطفال صبيان، يعني من جعله نبياً ممكن كان أن يجعل أبناءه الصبيان يعيشون. الله سبحانه وتعالى هو فرض أن تكون أن يكون، أن تكون يعني عائلة النبي، أو أحفاد النبي، أبناء بنته، هم أبناء بنته. مش أبناء، لتتغير عقلية العرب. ولم تتغير حتى الآن. كل ما له علاقة أنا قلت في حديث مؤخرًا كان في مؤتمر حكي عن حوار الأديان، قلت اختصاراً إنه كان العرب لم يسلموا وإنما عربوا الإسلام، بمعنى ضلّت العادات والتقاليد جاهلية؟ حتى الآن صحيح إنه البنات بالنص لها نصف ما للذكر، لكن يتلاعبون على حتى على النص ولا يورثون. عقلية ليست هي العقلية الدينية اللي عم واقفة بوجه المرأة، إنما مش العقلية الدينية، عقلية الذين يطبقون الدين، لأنه بعدها عقليتهم من خلال 1400 سنة بعدها عقليتهم جاهلية. يعني سابقة على الدين. وأي تعدد الزوجات مين قال إنه مسموح تعدد الزوجات. هو مش شرط الشرط العدالة بين الأمهات والأولاد وهذا بالظروف. تبدأ السورة، تبدأ عفو الآيات مش السورة، "وإن خفتن ألا تُقسطوا في اليتامى فانكحوا ما طاب لكم من النساء مثنى وثلاث ورباع"، بعدين "وإن خفتن ألا تعدلوا فواحدة أو ما ملكت أيمانكم ذلك أدنى ألا تُعولوا". "إن خفتن ألا تعدلوا فواحدة". ليش؟ لأنه العدل، قلة العدل بتعادل الشرك بالله. "إن خفتن [أن لا] تعدلوا، من من الذين تزوجوا أكثر من امرأة استطاع أن يعدل بين الولاد، بين الأولاد وبين النساء. ما في! يستحيل، يستحيل إنه يكون في عدل، بين، حتى بين الأولاد. لأنه الرجل عادة، إذا أحب المرأة أحب أبنائها، وكل التاريخ مثل ما كتبت بمقدمة المرأة والأندلس، نصف التاريخ الإسلامي المُطبّق يعني، التطبيق العملي للدين، أصلاً ما تطبق الدين بعد وفاة الرسول ما-- لم يطبق الدين، نظرياً، ما طبقوه. طبقوا الأعراف العربية، خلطوا، في خلط بين الأعراف العربية وبين الدين. أنا قلت في هذا الكلمة الأخيرة اللي قلتها، قلت، ارجعي لخطبة اسمها خطبة الوداع، أعطيتكم إياها بالجامعة، وقتها كنص أدبي. فيها ما بيذكر، لا يقول، ما بيقول النبي، بيحكي عن الولاية من بعده، بس ما بيحكي فيها عن الصلاة والصيام— أمر مفروغ منه صار لأنه الصلاة والصيام، في شي اسمه بالدين تقوى اجتماعية وتقوى فردية. التقوى الفردية الصلاة والصيام والعبادات. يمكن الله سبحانه وتعالى يسامحه للواحد، حرّ بينه وبين ربّه هيدي. ليس لها علاقة بالناس، بس في شي اسمها تقوى اجتماعية، يعني العلاقة بالآخر. وجمّعن، مجموعين بالقرآن بـ 3 آيات، بسورة الأنعام "قل تعالوا اتلوا ما حرّم ربكم عليكم". ليكي كأنه عم بقله درس، لما بتعطي إنتي درس بالصف، وبتقليلهم 1-2-3-4 هذا اللي بسموه بالإنجيل وبالتوراة وبالإنجيل الوصايا العشر. "قل تعالوا اتلوا ما حرّم ربكم عليكم، ألا تُشركوا به شيئاً وبالوالدين إحساناً". و، بحرف العطف، حرف العطف باللغة العربية المعطوف على، المعطوف عليه. "وبالوالدين إحساناً". بعددهم عشر وصايا، الوصايا هني إنه أن "لا تقرّبوا الفواحش ما ظهر منها— وإذا قلتم فاعدلوا ولو كان ذا تقوى". ويتحدّث عن مال اليتيم، ويتحدّث عن الكيل والميزان، ويتحدّث عن ويقول لهم بالنهاية والوفاء بالعهد. هاي هي الأمور الاجتماعية التي يمكن أن يُحاسب عليها الإنسان، مش على الصيام والصلاة بس. الصيام والصلاة قلنا بينه وبين ربّه قلنا. بس هيدي التقوى الاجتماعية اللي كل وحدة منهن، كل خطأ من هل أخطاء بيعادل الشرك بالله. فإذا، ولذلك النبي بخطبة الوداع آخر خطبة قبل، قبيل وفاته وقف وقال، حكى عن الربّي، الربّي التديين بالفائدة. حكى عن الربّي، لأنه بعدهن عارفهن إنه هيدي عادات ما راح يبطلوا عنها. ما حكى عن المحرّمات إطلاقاً، المحرّمات الثانية. حكى عن الربّي، حكى عن الثأر، إنه عن— حكى عن النسبي، حكى عن المرأة، حكى إنه اعتنوا فيهم. وقال وشو قال ليس لعربي على أعجمي فضل إلا بالتقوى، ومع ذلك استلموا الحكم وحكموا العرب الناس بالكثيهم وعاملهم وكأنيهم شعوب من الدرجة الثانية. سمّوهن الموالى، كل واحد مسلم غير عربي اسمه المولى مثلاً. فإذا السبب مش، ليس الدين، وإنما الذين يطبقون الدين، يطبقونه بعقليتهم الجاهلية.

ن.ر. [02:31:52]: سؤال أخير. كيف بتهتمني بنفسك، جسدك. فكرك ما شاء الله شغل، بحث وكتابة وتدرّيس---

د.ع. [02:32:01]: بهتمّ بجسدي بأي معنى، بمعنى إنه بس بهتم ب؟

ن.ر. [02:32:05]: ببشرك. بمشاعرك.

د.ع. [02:32:08]: لأ بشعري، أنا أول شغلة

ن.ر. [02:32:11]: مشاعرك.

د.ع. [02:32:12]: أه مشاعري؟

ن.ر. [02:32:13]: إنه كيف إنه بتعملي توازن بحياتك، نفسيًا؟

د.ع. [02:32:16]: هبي بنتجي لحالها، بيجي لوحده التوازن. لما بيكون مستأنس بالعمل إللي عم يشتغله. بيشتغل. يعني ما في مرّة كان، ما في تناقض عندي بين القضايا. كلها كانت مختلطة، كمان مثل ما كانت الأعمال مختلطة ببعضها كلّ الأمور مختلطة ببعضها يعني مش، ما في متطلّبات خاصّة لإنه إنتي بتصيري لما عم تشتغلي للأخرين، جزء من جزء من الشخصية ما في فصل بين الـ، بيناتن يمكن لإنه ما كان عندي وقت أساسًا فكر. في دائمة الوقت مسروق، الوقت مختلط يعني والأعمال متعدّدة ومتنوّعة. فما في وقت بالتفكير بالأمور الأخرى، بعدين لما بفكر، حتّى أنا لما بفكر بأمور، بأمور بتزعجني لنفترض بحولها لأمور إيجابية.

ن.ر. [02:33:13]: كيف بببدا يومك؟ أي ساعة بتفريقي مثلاً؟

د.ع. [02:13:16]: أنا بفيق قبل الصلاة، بصليّ وبقعد على المكتب لإتعب. يقوم يشتغل شي برتّب أو بنزل على الحديقة، أو شي. لإنه الآن أنا متقاعد، ما، بقرأ الشي إللي إلي أنا بالأول، الكتابة أبكر، ولما بتعب شوي بحولها لقراءة للأخرين-- يعني، بيختلط الأمر بين، الآن مشي بالحديقة. أحيانًا تلبية بعض الأمور الاجتماعية بس القليلة يعني لإنه مش منفتحة كثير على إنه مش منفتحة على المستوى الإفرادي، يعني أحيانًا بروح مناسبات حتّى ألتقي فيها بالأصدقاء مثلاً ممكن بالجمعيات أو شي يقوموا بنشاط أنا بروح على هل النشاط كرمال شوف الأصدقاء أو النشاط. بيتنوّع الوقت دائمة هوي غني. أنا بنام باكراً وبفيق باكراً ومستمرّ وما بنام بالنهار.

ن.ر. [02:34:37]: طيب هول كانوا كلّ أسنلتني. شكرًا إلك. بتحبّي تضيفي شي؟

د.ع. [02:34:41]: شكرًا إلك نسرين.